

الدموع الناطقة الجزء الأول

في رثاء النبي (صلى الله عليه وآله وسلم) وآله (عليهم السلام)

الشاعر جابر الكاظمي

مقدمة

- قلماً يظفر المتأمل في سجل التاريخ بحادثة كحادثة الطف وقضية كقضية أبي الأحرار الإمام الحسين بن علي بن أبي طالب (عليهم السلام) في إثارتها للوجدان الجماهيري وتحريمها للعاطفة الإنسانية بصورة مستمرة وبنفس الزخم الذي زلزلت به ساحة الأحداث في المقطع الذي وقعت فيه تلك الملحمة الخالدة التي تراءت للناس أسطورة في ما عرضته من مشاهد وسطّته من معاني وخلّفته من آثار.

ولئن كان للسماة دورها الرئيس في التخطيط لهذه القضية والتبليغ لها والعمل على إبقائها حية وهاجة مهما تقدم بها السن، فإنها لقاعدتها التي تبنتها وتعهّدت بالنضال في سبيلها هدفاً وفكراً ومنهجاً ورصيдаً وعملاً، ودوراً لا يغفل في إدامتها وترسيخها في الألباب والقلوب، إنها ظاهرة تناغم أخذ بين هذه القضية التي توقد بحرارتها النفوس فتطفق تعبّر عما يجول فيها من رؤى ومشاعر وبين هذه النفوس التي جنّدت لأداء وظيفتها إزاء هذه القضية كالزيت يحترق بالنار فيمؤنّها لتبقى شعلتها ملتهبة وملهبة ما دام له وجود.

ويبرز الشعر من بين فعاليات هذه القاعدة بما له من قوة في صياغة الفكر وقدرة في التعبير عنها وفعل في التحريك لها ليحتل مساحة مرموقة ويملاً فراغاً لا يملأ بغيره من ألوان التصوير والتعبير.

وهكذا كان للقضية منذ البداية وعلى طول الخط جيش من الشعراء رفعوا راية الدم وعلقوا أوسمة الطف وبرزوا بعد ما تشبعت بأبعاد كربلاء أذهانهم وجاشت بالمأساة نفوسهم ليصوروا في قصائدهم ما نخلوه من معين قضية كان العطش معلماً من معالم المظلومية والمأساة فيها، فكان لتلك القصائد الأثر الكبير في الدفاع عن قضية كربلاء وفي إحيائها وفي تعظيمها.

ومن هنا كان تأكيد الأئمة (صلوات الله عليهم) على هذا الحقل ودعمهم للدور الرسالي الذي يمكن أن يقوم به، فهذا . على سبيل المثال . أبو هارون المكفوف يقول: قال لي أبو عبد الله (عليه السلام): (يا أبا هارون أنشدني في الحسين (عليه السلام) فأنشدته فقال: أنشدني كما تنشدون . يعني بالرقّة . قال فأنشدته:

أمر على جدث الحسين فقل لأعظمه الرّكبة

قال: فبكى ثم قال زدني فنشدته القصيدة الأخرى قال: فبكى، فسمعت بكاءً من خلف الستر فلما فرغت قال: يا أبا هارون من أنشد في الحسين شعراً فبكى وأبكى عشرة كتبت لهم الجنة، ومن أنشد في الحسين شعراً فبكى وأبكى خمسة كتبت لهم الجنة، ومن أنشد في الحسين شعراً فبكى وأبكى واحداً كتبت لهما الجنة، ومن ذكر الحسين عنده فخرج من عينه من الدمع مقدار جناح ذبابة كان ثوابه على الله ولم يرض له بدون الجنة).

ويروي الكميّ بن زيد فيقول: دخلت على أبي جعفر (عليه السلام) فقال: والله يا كميّ لو كان عندنا مال لأعطيناك منه ولكن لك ما قال رسول الله (صلّى الله عليه وآله) لحسان: (لا يزال معك روح القدس ما ذبيت عنا).

ويطالعنا الإمام الرضا (صلوات الله وسلامه عليه) فيما ورد عنه في مقام تحليل شعراء أهل البيت (عليهم السلام) بقوله: (ما قال مؤمن فينا شعراً يمدحنا به إلا بنى الله تعالى له مدينة في الجنة أوسع من الدنيا سبع مرات يزوره فيها كل ملك مقرب وكل نبي مرسل).

نعم إنها رسالة الشعر حين ينطق ليحرك الناس في خط الحق وليساهم في دحر الباطل وليؤدي دوره في مسيرة خلافة الله تعالى في أرضه.

و(الدموع الناطقة) حلقة من هذه الحلقات المتواصلة ذرفها شاعر موهوب من شعراء أهل البيت (عليهم السلام) وأنجبت الكاظمية المقدسة وهو الشاعر جابر الكاظمي، ويمثل الدموع الناطقة ديوانه الشعري الذي يتميز به من إبداع في التصوير وجمال في التعبير وإخلاص في العمل ورسالية في الطرح وجلال في المادة قد ملاً فراغاً كان لابد أن يسد تراثنا الأدبي الشعبي، الأمر الذي يبعث على أن نشدّ على يديه ونحيي جهوده ونكرم أعماله وندعو الله تعالى له بالقبول والتسديد.

في قصائد الكعدة

والمُجَدَّاه

ضلعين هشَّمتها الدهر واشتد المصاب
صدرين واحد بالحرب والثاني بالباب
زمني شجم طفل يَتَمَّ وتدري شجم ظلع هشَّمت
ضلعين هشَّمتها الدهر واشتد المصاب

* * *

يا رسول الله بحياتك كابدت آلام كثره
خانت الأمة وصيتك عكبك وغدرت العتره
وهشَّمتوا ضلعين منك ضلع أبو اليمه والزهره
أول ضلع صابه الألم من دفعة الباب انجسم
والثاني بالطف انهشم جالت الخيل إعله صدره
كسرين من دفعة الباب ومن الخيول
جرحين ما ظن الألم من عدهن يزول
ولا ظن بعد تتبلسم وتدري شجم ضلع هشَّمت
ضلعين هشَّمتها الدهر واشتد المصاب

* * *

وگع من الزهره محسن من بعد كسرة ضلعها
هذا أول طفل منكم كضه وللعتره فجعها
الثاني عبد الله الرضيع ورگبته الظالم كطعها
يا ذنب عامل هالطفل بالسهم نخره ينفصل
محسن بها المحنه أصل وصار عبد الله فرعها
نخرين صوبها الزمان وتعلم شصار
طفلين واحد بالسهم والثاني بسمار
يا هو الأكثر اتألم تدري شجم ضلع هشَّمت
ضلعين هشَّمتها الدهر واشتد المصاب

* * *

أمتك يالهادي عكبك نقضت عهود الوصيه

اتلاهبث نارين منهم واحده بدار الزچيّه
وثاني نار الوجروها إعله الخيم بالغازريّه
باب البتول اموجره ونار المخيم مسعره
والعتره ظلّت حايره بين ثاني وآل أميّه
شمرين هجموا عالبتول وشبّوا النار
جمرين واحد بالخيم والثاني بالدار
ولمن شب المخيم تدري شچم ضلع هشم
ضلعين هشّمها الدهر واشتد المصاب

* * *

من عكب محنة الزهره ريتك الحيدر تشوفه
ابن ملجم صاب راسه واصرعه بمسجد الكوفه
اصوابه خلّه العمد يفضخ راس عباس إحتوفه
حامي الحمه بسيف إنطبر ومثله انفظخ راس الكمر
من طاح مرمي اعله النهر ويّمّه متكطعه چفوفه
راسين صوبّين ابن ملجم ابعامود
چفين فوگ النهر كطعوها من الزنود
وجسم الكافل إتخّدم تدري شچم ضلع هشّم
ضلعين هشّمها الدهر واشتد المصاب

* * *

كطّعوا چبدين منكم وآنته يالمختار تعلم
چبد الأول آل اميه من الحسن كطعوه بالسّم
وچبد أبو السجاد مثله بسهم المثلث تخّدم
چبدين تدري تگطعن كطعوها عبّاد الوثن
چبد أبو اليّمه والحسن والهضم عالعتزه خيم
چبدين واحد للحسن والثاني لحسين
كلبين فايض دمها ويه دمعة العين
دمعنه تفايض إويه الدم وتدري شچم ضلع هشّم
ضلعين هشّمها الدهر واشتد المصاب

* * *

يا رسول الله بوفاتك كَيِّدُوا حامي الحميَّه
وانغصب عاليه عكبك من اجل حفظ الوصيَّه
وثاني كيد بهالليل الكيدوه اعلوج اميَّه
حيدر كَيِّد بالصبر ومثله العليل ابها الأمر
من طلع مكيود بيسر ويَّه العيال السيَّه
كَيِّدين ابركبه حيدر ورکبه السجاد
جيدین طوگها الدهر بأغال وأصفاد
ابكل هاي المحن تعلم وتدری شچم ضلع هشتم
ضلعين هشتمها الدهر واشتد المصاب

* * *

وانته يالمختار تدري ابركلا اشصارت مصايب
جثث أولادك رميَّه، ودارت اعلیها الكتايب
والأشد من هاي واعظم ظلن ابناك غرايب
يالهادي هذي كربلا وموقف حزن نتامله
من يسروا هالعايله
كبل ما تطلع العيله لليسر نادتك زينب
وين يالمختار عتي وتنظر الخدر المسلَّب
وباليسر تطلع بناتك هذي حاله عليك تصعب
بصوت الحزن يالمصطفه صاحت عله الدنيه العفه
ودم المدامع تذرفه
يزيد مثل الثاني وانته تدري بيهم يا مُحَمَّد

* * *

تغريد القلوب

تصبح الكلوب ابحبك اندوب
يا علي الباري فرض حبك عليه واحنه من عالم الذر بيك اقتدينه
تصبح الكلوب ابحبك اندوب

* * *

يا علي ابسابق النشأة البيها صرنه من البدايه
الباري طينتنه انتجبها من قعر بحر الولايه
امتزجت ايماي الهدايه، المن ولاك ارتشف مايه
حبك ابطينتنه انمزج وضامرته بالنور ابتهج
ولسانه باسمك لهج يَلِي اسمك أشرف آيه
وجنة الروح منك اتفوح
يا عطر دوحه الإيمان ويقينه إحنه من عالم الذر بيك اقتدينه
تصبح الكلوب ابحبك اندوب

* * *

يا علي انتة الأصول الخمسة للدين وقوامه
منك التوحيد بيدي والنبوة والإمامه
والعدل حكمه بوجودك وانتة ميعاد القيامة
ياحبك بدمي اتحد يا قل هو الله أحد
يابيبك دين الله انوجد وانتة دستوره ونظامه
انتة احكام دين الإسلام
انتة دين الله وعلى هديك مشينه واحنه من عالم الذر بيك اقتدينه
تصبح الكلوب ابحبك اندوب

* * *

يا علي اتغذيت حبك من ثدي صافي المرضع
امي غذتني الولايه وصار الي بهالنعمة مرتع
والدي امنحني المحبه وفرعي من أصله تفرّع
استارثت حبك من هلي وأصبح مذاقي ومنهلي

وانغمركلبي يا علي وابشرف حبك تولّع
واليواليك يلتزم بيك
عهد حبك بالضمير مسجلينه واحنه من عالم الذر بيك اقتدينه
تصيح الكلوب ابحك اندوب
* * *

يا علي استخلصت حبك من كلب صافي وموالي
وظهر ناتج هالمحبه نور يسطع بالمعالي
واتحد نور الولايه بروحي وبخالص اعماله
يا علي ومن هز المهدي حبك ويه الروح اتحد
وكل مفصل بجسمي شهد حبك متمم كمالي
طبتك نور بجانب الطور
يا علي اتكونه من فاضل الطينه واحنه من عالم الذر بيك اقتدينه
تصيح الكلوب ابحك اندوب
* * *

يا علي كونك ربك من سنائه ولطف ذاته
وصاغلك حلية صفات امطعمه بجوهر صفاته
ومد سلك مرضات بينه وبينك لمكسب رضاته
تياره نور ولايتك ورحمة الباري رحمتك
واللي صفح عن سيرتك صيامه مفيده وصلاته
انته سلطان هاي الأكوان
الرايد يضاهيك يا أبا الحسن وينه واحنه من عالم الذر بيك اقتدينه
تصيح الكلوب ابحك اندوب
* * *

يا علي هاتف القدرة من العرش وجّه ندائه
وگفت گباله الخلائق ويه رسله وأنبياءه
نظرت اعلاه اللوح شافت اسمك ايشع بضياه
واشلون وگفته صادق مخلوق گابل خالقه
بمعجزة شخصك واثقة وصاحوا إنقر بولاءه

انكتبت اعهود حبك شهود
عهد بالتوحيد والثاني بنينه واحنه من عالم الذر بيبك اقتدينه
تصيح الكلوب ابجك اندوب

* * *

يا علي كلوب التودك هايمه ابشوك الحبه
وكل موالي بقلم حبك اسمك امسجل بگلبه
خطته حروف الولايه النورت مصباح دربه
يا تاج أشراف المله ابهديك تسير القافله
لا مبعده ولا فاصله اشما تصير المشيه صعبه
احنه ماشين بمنهج الدين
هذا عهد الملتزم باحكام دينه احنه من عالم الذر بيبك اقتدينه
تصيح الكلوب ابجك اندوب

* * *

يا علي لسلمان انتة حضرتة وتوليت دفنه
وجهزت اچفانه بيدك وأبد ما خييت ظنه
اشلون ظل حسين جسمه إعله الشره ومحد يچفنه
ليش حسين ظل جسمه فوك الغبره
عالتربان متغسل بدم نحره
يا كرار شنهو السبب متحضره

* * *

يا علي تناديك زينب ليش متلبي نداها
تظن بعده اللي ذخرته للحرم يحمي حماها
انگطعت چفوف الكفاله وطاح من هاشم لواها
والايتام فرت ومذعورة راي
تنادي بصوت وين اليهزم نخواي
يا عباس يا عمي جزنه من الماي
بس نريدك ترجعنه للوطن وانه كفلتنه

* * *

دمشق ١٩٨٠ م

مسلم بن عقيل

هذا معروف العايش أيشوف
بالخيانة منوصف مجمع الكوفه
بكل عصر لو تطلع تكدر تشوفه
هذا معروف العايش أيشوف

* * *

مو نظم شاعر خيالي وسارح ابعالم خياله
ولا قلم كاتب يريد ايّين الفن والجزاله
لاچن انبيّن حقايق كل بشر حسب امتثاله
وانشوف ميزان الدهر من يخذع أهواء البشر
للعدل ميخلي أثر ويرفض التهوّه العداله
واللي مغرور يا خذه السور
اليمشي عالبلين ويساير ظروفه
بكل زمن لو تطلع تكدر تشوفه
هذا معروف العايش أيشوف

* * *

انظر ابعين البصيرة لو ردت للحق تنوله
ابدي من يوم الغدير ابفكرك استعرض فصوله
يا سبب خلّه الإله أياكّد الخطبة رسوله
والخطبة موقفها انشهد واناخذ ميثاق العهد
واللي خلف عن الوعد ترك دينه من أصوله
أمره مشهود نقض العهود
واليشوف العدل جدّامه ويعوفه
ابكل عصر لو تطلع تكدر تشوفه
هذا معروف العايش أيشوف

* * *

ضامره المملي خيانه، للعهد خلاّ يعوفه

ومجرم الخاين البيعه بكل عصر تكدر تشوفه
عرج ابفكر النزاهه وانظر المجمع الكوفه
بعثوا لبو اليمه كتب انبايعك بايمان الكلب
ويجبهتك سلم وحرب اشما الدهر غير صروفه
هذا مضمون ناتجه اشلون
انتظر ناتج مجمع الكوفه ابألوفه
بكل عصر لو تطلع تكدر تشوفه
هذا معروف العايش أيشوف

* * *

الكوفه من شافت تأخر گامت اتضخ ابكتبها
وابو السجاد الرحله بكل نواتجها حسبها
وانبعث مندوب عنه وغايته يلبي طلبها
للكوفه مسلم من وصل ابصفوة كوادرها اتصل
وبشخص أبو اليمه امتثل وفتحت لمسلم كلبها
رحبت بيه وأثنت اعليه
نقل الهم راي أبو اليمه المحروفه
بكل عصر لو تطلع تكدر تشوفه
هذا معروف العايش أيشوف

* * *

انتهت فترات الخطابه أو وثق مسلم بالركيزه
اثنعش الف أوياه صارت لاجن ابفتره وجيزه
وقاعدة وصف الخيانه اتصير بالخائن غريزه
متمالكوا حقد النفس ورائدهم أصبح يحترس
هاجمع يشرحلك درس كل بشر يمتلك ميزه
الرحبت بيه ثارت اعليه
بيا عصر المعزب ايخون ابضيوفه
بكل عصر لو تطلع تكدر تشوفه
هذا معروف العايش أيشوف

* * *

خانت بمسلم الكوفه وگومها اتغيرت ابسرعه
اشما سجايه الأصل تخفي تالي تتبين ابفرعه
التزموا ابفتوة شريح وأمر مسلم صار بدعه
ناس اليضنها ابجانبه صارت ابدمه امطالبه
ومسلم لفه ابروح الابيه وخبّه نفسه بدار طوعه

مسلم احتار بين الاشرار
التجأ صامد والعزم فايض ابجوفه
بكل عصر لو تطلع تكدر تشوفه
هذا معروف العايش أيشوف

* * *

وابن طوعه حين شاهد مسلم ابيته تأثر
طلع من طيبه الخبيث بمالفعل للآيه فسّر
مسرّع اتعنه لمحمد ابن الاشعث عنه خبر
وللخير لمن بيّنه أصبح لعق عالأسنه
والطاغيه بسرعه اعتنه راح لابن زياد بشر

وحاكم الجور كلبه مسرور
وظالم اللي طوّق الدار بسيوفه
بكل عصر لو تطلع تكدر تشوفه
هذا معروف العايش أيشوف

* * *

طلع من الدار مسلم قاتل عداه ابجداره
اخذ بيهم وطر ثابت لاچن اتغير قراره
استنزفوا عزمه وخذوه اميسر الكصر الاماره
وصدّر ابن زياد الأمر إحضار مسلم للكصر
ما بين سطوات الغدر خايف او دمه أيتجاره
لا تظن خاف من الأجلاف
لجل أبو السجاد مسلم چان خوفه

بكل عصر لو تطلّع تكدر تشوفه
هذا معروف العايش أيشوف

* * *

من القصر مسلم رموه وهشّموا جسمه الأعادي
ويدري من بعده تضحي بكرّ بلا صفوة الهادي
وجنّه يسمعها حميده بنته برض الطف تنادي
يا بويه انظر حالي طفله ويتيمه بغربي
واليتم كطّع جبدتي
مثل حال اسكينه حالي ومثل حالك حال أبوها

* * *

دمشق ١٩٨٠ م

مسيرة الحسين (عليه السلام)

فكر واعى وقلب مومن بالمصير
امن المدينة لكربله يريد المسير
للشهادة يبين استعداده خل نتابع غاية استشهاد
نشوف بالتالي شيصير تبگه يم اهل الضمير

* * *

كل نبي ومرسل يلاكي بتأدية دوره مصاعب
والنجاح بحكم صبره اشما صبر يكسب تجاوب
كلهم بهالنهج ساروا صبروا وأدوا الواجب
كل مرسل بدوره اكتفه بالصبر تم موقفه
لاچن نشوف المصطفه حمل انواع المتاعب
بالمسيره لاگه چم موقف خطير
منها تبليغ الوحي بيوم الغدير
بلغ بمنزل حسب تشريعه بعدك لحيدر تكون البيعه
ليش هالموقف خطير تبگه يم اهل الضمير

* * *

كثره من هاي المواقف جابه الهادي بحياته
واظهرت أحقاد گومه من دنت ساعة وفاته
انظلمت الذريه بعده وبدت لوعة ناياته
والفتنه بعده اتبيئت وأحكام دين الله انفنت
لاچن أبات اتعيئت للظلم تعلن مماته
القى نظره خاطفه وقيس الابعاد
وشوف أبيّ العظيم من ناده الجهاد
علن ثوره اموقتّه وموعده حين شاف الظلم جاز حدوده
ليا هدف أصبح يشير تبگه يم اهل الضمير

* * *

رزم ظعن الثوره وأنوه لكربله ووجه رحاله

خل نرد ونشوف ليش حسين إخذ ويا عياله
وليش من مكه الشريف لكربله إنتقلت أمواله
يا دافع اللي حقّه ويا دور رايد ينجزه
أهل الفكر مو عاجزه لو تحي وتدرس الحاله
حسين ثائر لنصرة الحق مستطيع
ليش وياّه إخذ عبد الله الرضيع
هالأسرار الرايد استكشافها يدرس الثوره وبُعد أهدافها
يشوف ناتجها الأخير تبكّه يم أهل الضمير

* * *

وصل لأرض الغاضريه امتوّج ابتاج البساله
بسبعه وثمانين ثائر والعدد تم اكتماله
وخطه الحرب الرسمها انوضعت بأمر الجلاله
خطه حرب متعنونه ميسره وقلب وميمنه
والقائد اللي عيّنه كافل بنات الرساله
لگمر هاشم سلّمه أربع مهام
صارم وجود اولوه وحرس الخيام
قائد ورايته تريد تشوفه عالنهر لمن يضحّي چفوفه
بيد يا فارس تصير تبكّه يم أهل الضمير

* * *

اتجسّمت هاي المواقف وأبو اليمه احسابه عنده
ويدري من بعد العضيده بكربله ينفرده وحده
وينچتل بين إيد زمره بايعت وأنقضت عهده
هالموقف أصبح يتضح وبكل زمن يعرض شرح
لو حسن الإسلام بجرح بالدمه لجرحه نضمده
حسين قدّم إله أسمي التضحيات
بدرسه وضّح عزة الحق بالممات
دينّه وإحنه النضمده اجروحه وبالدماء اسنجل الاطروحه
بالنتائج ما نحير تبكّه يم أهل الضمير

* * *

كربله اَبْجَسَّمتْ اِلنه وابن هند اتضح ظلمه
وشفنه اَبو السجاد مرمي وعالصعيد ايسيل دمه
وانفضح ذاك التجاني والغدر من ذبيح الامه
والظالم ابفعله انعرف والخلف من ذاك السلف
وبن اَبو سفيان انكشف المثلثه ما ينقبل حكمه
احنه عالحگ عنه اَبداً ما نميل
اشما يصير الدرب بالمسلك طويل
مثل اَبو اليمه نقدم ارواحنه ومثل دمه يسيل دم اجر احنه
والي عالباطل تسير تبگه يم اهل الضمير

* * *

كل عصر يملك شهيد ومثل اَبو السجاد ثاير
وكل عصر يملك يزيد الطاغيه وبالحكم جاير
هذي صوره واقعيه ومشهد لأهل الضماير
وذاك التجاني والغدر أصبح يدور ابكل عصر
أقسم وحگ هتك الخدر انسقطه ابدم المناحر
من يزيد لهاليزيد الاتصال
مثله مترَّبَع على عرش الضلال
طاغي يتغطرس ابسوء أعماله وعاهلاك اتقرَّبَت آجاله
التقبل الظالم اَمير تبگه يم اهل الضمير

* * *

حسين من أجل العقيدته استشهد وضحَّه اَبو جوده
ورسم للأجيال صفحه امعنونه اَبْهَمَّه جهوده
ومن دمه جروح البجسمه للشرع ضامن خلوده
جسم حسين لمن وگع عالغيره
ابفيض ادماه سجَّل شعار الثوره
وهالمظلوم أصبح چتيل العبره
استوحدوه اَشْرار اميَّه لا معين ولا نصير

* * *

حسين لمن غضه نخبه وعيلته ظلّت غريبه
لا كفيل ولا محامي وجارت اعليها المصيبة
اتشوف صيوان أبو اليمه والخدر شاجر لهيبه
والايتام تاهت عكب واليهما
ونار الكوم تنطفي وتسعر بيها
ابدرب الشام صار الشمر حاديها
وسادس أهل العصمة ويّه العايله أخذوه يسير

* * *

الكاظمية المقدسة ١٩٧٩ م

نداء السيف

ليل مظلم لمن أيزول الظلام
تسكت الألسن ولل سيف الكلام
والزمان اشما تجور سنينه ما يموت الوهب دمه الدينه
والنصر مسك الختام هذا تصريح الإمام

* * *

اصطفت الصفوه الشريفه ابليل متلبّد ظلامه
وصدر تبليغ الجلاله ووضّحه لسان الإمامه
ولبسوا أكفان الشهاده والمجد هياً وسامه
ما بين آمال وصبر تنتظر مطلاع الفجر
وحسين صدّر هالأمر صاحت اصحاب الشهامه
هاي ليله وننتظر فجر الحروب
والشهاده من الدمه اتفصل الثوب
ننتظر يكشف ظلام الليله وكل مجاهد مصرعه اليوحيله
وندخل الحومه ابنظام هذا تصريح الإمام

* * *

هذي ليلتنه الأخيره وأحلى من كل الليالي
وباچر أصوات الجهاد اتردد ابأوج المعالي
نشترى الحق ابدمانه اشما يصير الثمن غالي
جناح الحرب من ينخفض جمله الألسن تنرفض
والسيف يبدأ باللفظ وييدي رايه ابصوت عالي
هاي حومه وببها مقيام الرجال
الما يهاب الموت يدخل للقتال
السيف عن الحرب ما يتغاضه لو نطق ميحور ابألفاظه
ابضرته أيوضح الكلام هذا تصريح الإمام

* * *

بالحرب أصدق لسان السيف من ييدي ابخطابه

ايتمثل الجف الحمله ولو سأل بالجف جوابه
بالحرب لو راد يظمه امن العده ينبع شرابه
بالحرب لو صابه الظمه الجف الحمله أيكلمه
مشتاق چاسات الدمه ويرتوي بساعه ضرابه
السيف آيه ومن يسدد عن يقين
للمجاهد يضمن الفتح المبين
ومن يعين ضربته القهاره بالخراب تنكشف أسراره
وضربه الحق باستقام هذا تصريح الإمام

* * *

اشما تصير الحاله صعبه تسهل وهيها تصعب
گبالنه الطاغيه امهياً إينه سبعين ألف مرحب
وسبعه وثمانين حيدر إحنه للأمثال مضرب
وأمر الخراب لو صدر بسيوفنه انلقن عبر
والقائد ابسمه ثغر لراية الإيمان ضهضب
امن الجلاله لو صدر انه القرار
بالمعاره سيوفنه اتشن الدمار
والأمرنه ابالمهام أيشوفنه نشرح ابنود الأمر بسيوفنه
نتبعها بالتزام هذا تصريح الإمام

* * *

بالحرب سيف المجاهد ينطق ابحكم الجلاله
وبالوميض امن المعاره للعله يصير اتصاله
ولو كقطع كلب الاعادي ايضمده الكلب الرساله
السيف اليحتم كل حتم لو علن ساعات الحسم
ابجبه الطاغيه تنرسم للغدر صفحة أفعاله
بالمهالك يوكع ابسوء الافعال
بالمعارك يفشل البيوم القتال
والطغاة اشما تجور اليالها حتماً اتشوف المماه گبالها
وينقري اعليها السلام هذا تصريح الإمام

* * *

الطاغية اشما زاد ظلمه حتماً انهدم كيانه
هذا تصريح الجهاد البلغة السيف ابلسانه
اليفتدي النهج العقيدة ينجح ابيوم امتحانه
ولو دارت صفوف الحرب للموت يفتحله الكلب
ابيوم الحرب ما يغلّب وبالحرب يكشف ضمانه
هاي شدّه وعن المبدأ ما تزول
اله بالصارم وتحذيب العقول
ابساعة الحرب اللي يعقد رايه يكسب الجوله وينول الغايه
ويقتدي ابراي الحسام هذا تصريح الإمام

* * *

احنه أنصار العقيدة الساميه والباري يعلم
هذي غايته الأصيله نكتب المنهاج بالدم
وثغر ام الحزن زينب بالنصر كون ايتيلسم
ولمن تروح اميسره ابشخص أبو اليمه ثايره
والابن هند اتدهوره وعلى الذله الطاغي يرغم
من دمانه انسجل احروف الكتاب
وبالتفادي ينشرح فصل الخطاب
ثوره تمتاز ابكلام اسيوفها ومثل هالثوره الدهر ميشوفها
وبالوصف تعجز أقلام هذا تصريح الإمام

* * *

دمشق / ١٩٨٠ م

الأسرار

أسرار أسرار هذا العالم أسرار
واليتبع أخباره يكدّر يكشف أسرار
هذا العالم أسرار

* * *

كل بشر حسب إطلاعه يكشف أسرار ابفكرته
واحد اتوصله البحوث وواحد اتوصله فطرته
أو واحد ايشوف الحقيقه ابعينه وايغالط نظرتة
واحد يعجبك ظاهره وما تدري شنهو ابضامره
وواحد طفل تتصوره وهو علامه ابخبرته
أنوار أنوار نهج العلم أنوار
واليهتدي بأنواره يكدّر يكشف أسرار
هذا العالم أسرار

* * *

بالعلم كل شخص يكدّر ينظر الحق بأطلاعه
هذي جوله ابلا نهايه الحق مع الباطل صراعه
من بدأ تكوين آدم لحد ما تُعلن الساعه
ابواقع نعيشه وبالكتب باطل وحكّ دوم ابجرب
نتنظر والنتاج صعب اتفوز يا قدره إبراعه
أدوار أدوار حرب انقسمت أدوار
واللي أيسلسل ادواره يكدّر يكشف أسرار
هذا العالم أسرار

* * *

انسلسل أدواره ونشوف الباري من كونه لآدم
حدّره من ابليس كلّه لا تتابع رايه تسلم
ليش خالف أمر ربه واليخالف ربه يندم
لهذا النبي ابليس اخدعه وابعولة الحرب اصصره

لو چان للربّ طايعة على الشجرة ما تقدم
مختار مختار آدم صبح مختار
يريد الذنبه اغفاره يگدر يکشف أسرار
هذا العالم أسرار

* * *

بالتسلسل نبگه نمشي ونطلع عن ثاني صورة
ليش قابيل إين آدم غدر هاييل ابشوره
لو طمع چان الیدفعه؟ لو فعل ناتج غروره؟
وابفكرک اتعمّق بعد واتشوف ابن نوح انفرد
عن السفينه من ابتعد بالهلاک انکشف دوره
أضرار أضرار ظلم النفس أضرار
واليجتنب أضراره يگدر يکشف أسرار
هذا العالم أسرار

* * *

نترکه العاد وثمود وكلمن اتمیز ابظلمه
ونترك إبراهيم يم نموده يتباصر ابحكمه
ونترکه الموسی وعصاته النزلت اعله الظلم نغمه
واليوسف انوجه النظر بأضعان اخوته من انغدر
عن والده انکف البصر وعکف يعگوب اعله همه
أشرار أشرار اخوة يوسف أشرار
وحقد اخوته الغداره يگدر يکشف أسرار
هذا العالم أسرار

* * *

نرجع انواصل شرحنه ونوضع لكل نقطه مرصد
چم جمع من هالتنافر من بعد شمله تبدد
وننظر المجمع قريش اللي بزغ منهم محمد
کوکب وخاتم للرسل ابدستوره يجمع کل شمل
ما يركن لبرج الأفل ونوره للأفکار فرق

أفكار أفكار مرسل محي الأفكار
الراد أينور أفكاره يكدّر يكشف سراره
هذا العالم أسرار

* * *

حاربوا نهجه قريش وظل رسول الله صامد
غايته يأدي الرسالة وثبتت إيمكه القواعد
وطلع من مكه الشريفه امهاجر ابصيغة مجاهد
من بعده چم نائر طلع لاچن المكه ما رجع
فوك الرمح راسه ركع وجسمه فوك الغبره ساجد
أحرار أحرار حسين أيريد أحرار
المد سلكه اعله تياره يكدّر يكشف أسرار
هذا العالم أسرار

* * *

كربلا اتوضح حقايق بين حگ وبين باطل
بالنهايه انشوف يا هو الفاز بيها ويا هو فاشل
الکطعت جسمه السيوف ابدمه وهج هالمشاعل
بالدمه الفاض ايمنجره شعله الحق امنوره
بالدهر ظلت زاهره وكشفت أسرار الأوائل
أبرار أبرار حسين أيريد أبرار
ابدمه تم اظهاره يكدّر يكشف أسرار
هذا العالم أسرار

* * *

دمشق ١٩٨٠ م

الحرّ الرياحي

للمنضال للشهادة والوضوح باعتقاده
قائد ومتمركز ابساحة قتال ايبا صفوف ابفكره يوثق الاتصال
خل نتابع استناده للمنضال للشهادة

* * *

كل بطل يملك عقيدة راسخه والها يناضل
لغايته ايقدم حياته انجان حگ انجان باطل
وتنرسم غايته ابعينه ابعزمه عن فكره يقاتل
معروفه هاي الظاهره كل بطل صاحب مقدره
يملك عقيدة ابظامره وابعزم كلبه يواصل
بالطفوف بطل ضاهر بالمعارك وكف حاير
جبهتين كباله تحمل اعتقاد جبهه عالباطل وجبهه اعله الرشاد
ويه يا جبهه اعتقاده للمنضال للشهادة

* * *

بين جبهات القتال انشوف هذا البطل حاير
وكف بين الجبهتين النهج يا جبهه يناصر
جبهه حگ وجبهه باطل والشدّد كشف السرائر
الحر من وكف بين الجمع الكشف الحقيقه يطّلع
للجانبين أبده السمع وكشف مقياس الضماير
الاتعاظ باستماعه والرشاد باطلاعه
شاف نفسه ابين جنه وبين نار والشهم ينجح بيوم الاختبار
وتبدي من عنده الافاده للمنضال للشهادة

* * *

من سمع خطبة حسين الحر إخذ منها اتّعاضه
وعرف بابن زياد لجل الطمع هذا الحدث خاضه
ندم عن مبدأ طلوعه والدمع بالجفن فاضه
الحر الرياحي من وكف وارتعدت أعضائه ورجف

من مبدأ الفطره هتف صوت ومعطره الفاظه
بالضمير اهتمامي وبالمبادئ التزامي
هالبطل بيدي ابضميره الاهتمام وبطريق العدل يمشي باستقام
ابفكره يبحث عن رشاده للنضال للشهاده
* * *

(والمهاجر ابن الآوس) انبهر من شاهد ذهوله
ناده يا حر اشجرالك يا رمز معنى الرجوله
لو ينشدوني اعله عزمك ما عدوتك بالبطوله
رد الفعل من ينعكس للعالم أيوضح درس
كل ثمر يرجع للغرس وكل فرع يتبع أصوله
التزام بالعقيده الموت لاجل الدين عيده
اتوجه الصوب أبو اليمه بانكسار أو وجهه بالإيمان يتبهل أنوار
السيرة الحق انشداده للنضال للشهاده
* * *

من وصل يم أبو اليمه ابوجهه مرسومه الندامه
وگف يم حسين لاجن الانكسار أحنى قوامه
وصاح استغفر الباري وتبت بين ايد الإمامه
وحسين للحر خاطبه تُغفر ذنوب التائبه
وابن الرياحي جاوبه يا شفيعي بالقيامه
للحروب أرد أواصل بين أيديك أرد أقاتل
امن الندم ما نزل عن ظهر الجواد وسيفه متمركز ابجف الاعتقاد
والجهاد اشرف عباده للنضال للشهاده
* * *

للحرب قدّم (بُكير) وشاهد استشهاده ابنه
وخاطبه الحر بالشهاده يولدي مبارك تهنه
والوعد يم الرسول ومربك روضة الجنة
واگف الحر وينتظر امن حسين إصدار الأمر
وللدين يضمنله النصر وبالنصر ما خاب ضنّه

للقِتال صدر أمره للجهاد ابتسم ثغره
وارتجز من كلب ما يعرف الخوف رَوَّع العسكر وابو اليمه يشوف
أبدع الحر بجهاده للنضال للشهادة

* * *

كُطع كلب الحرب سيفه ورَوَّع الحومه ابجهاده
وبالنصر حصَّل الغايه أو مكث يربوع الشهاده
وصار مضرب للامثال ابنصرة الحق اعتقاده
وحسين ناداه يا شهم سَمَّتْكَ أَمْك والنعم
حر وانطبق بيك الاسم وبالخشر نلت السعاده
كل غيور من يجاهد بالزمان ييگه خالد
انجاهد إو بالحر يكون الامثال وبالشهادة ايصير حبل الاتصال
ومثله نحصل عالسعاده للنضال للشهادة

* * *

جثة الحر على الغبره المخضبه بدم المنيه
وأسرعت آل الرياحي ودفنته الراعي الحميه
بس أبو السجاد ظلت جثته فوگ الوطيه
مَحَّد دفن راعي الشيم
واتسلَّبت عگبه الحرم
واتلاهببت نار الخيم
وعيلته ظلت غريبه لا كفيل ولا محامي

* * *

دمشق ١٩٨٠ م

صرخة أنصار الحسين (عليه السلام)

نفديك يحسين بالروح والدم
والتضحية اليوم موقف اتحتم
يحسين هاي الثورة نتمناها ابعين الشهادة لكربله ارضدناها
موقف اتحتم

* * *

انفتحت أبواب النضال ورفرف اجناح السعاده
والجهاد أشرف حديث وعن أبو اليمه استناده
وابجهاد الظلم نكسب أسمى غايات العباده
احرار نبكّه بكل زمن وما نرضخ لعابد وثن
والدين لو ركنه انرجن انشيده بدم الشهاده
احرار احرار والباري يعلم
صوت النحر صاح مو لفظه بالفم
هاالصرخه من جوف النحر صحنها ابعين الشهاده لكربله ارضدناها
موقف اتحتم

* * *

احنه أحرار ونظل أحرار مثلك يبو اليمه
اشما الطاغي اعلينه جار وبالاحقاد ايزيد ظلمه
نقسم ابدم الكرامه حتماً لعرشه نخدمه
أنصارك بروح وعدد وبدمنه نبني المعتقد
والنحر لو ينسه العهد أيدكره بمالعهد دمه
والوعد لو حان والعالم اظلم
نقمع الطغيان وهيهاات نهتم
النه لقاء بكربلا ويّاها ابعين الشهاده لكربلا ارضدناها
موقف اتحتم

* * *

ليلة الظلم رهيبه وننتظر طلعة فجره

بكربلا لو صدر أمرك للحرب نفتح صدرنه
توگف اصفوف القتال وللوغه انصافح سمرنه
بالطف نخوض الملحمه والنحر لو فاض بدمه
لنهج الإسلام انترجمه لكل لغه اتعايش عصرنه
والدمه لو سال للنهج ترجم
اطروحة إيمان للبشر قدّم
هاي الشروح ابنهجك درسناها ابعين الشهاده لكربلا ارصدناها
موقف اتحتم

* * *

انته قرآن الاله النطق بأحكام البلاغه
تنطق ابحق الجلاله وصاغك الخالق صياغه
ترجمانك من دمانه وللكفر نعلن ادماغه
ندمغ دياجير الكفر من تنرفع بيض وسممر
ننتظر اصدار الأمر وللحرب نملي فراغه
أمرك المحتوم اصداره لو تم
عن صدر الإسلام ينزال كل هم
خوض المعارك بالوفه اشمحلاها ابعين الشهاده لكربله ارصدناها
موقف اتحتم

* * *

كعبة الأحرار انته واحنه للكعبه ضحيه
يا منار التضحيات الزهه بأفاق الثريه
بنورك انتور گلبنه بهالعقيده المبدئيه
يا مصحف الحق والعدل بمنهج وداك نتصل
ما يوم عنك ننفصل ابجنتك آخره ودنيه
واليثأر عليك شيطان مُبرم
قاعده الشيطان بالحجر يُرجم
وسيوفنه ابهالأمر وصيناها ابعين الشهاده لكربله ارصدناها
موقف اتحتم

* * *

انته مدرسة الإله وبيك تحريك الضماير
وثورتك منهاج حق المؤمن العالظم ثاير
واحنه انصارك وگبلك نفتدي بگطع المناجر
واحنه اندخرنه لثورتك نضحى الأرواح النصرتك
غايته من سر غايتك وبالحرث كشف السرائر
بالدمه الفيض نكشف المبهم
وسر النصر لاح والواعي يفهم
مجل أسرار النصر وضّحناها ابعين الشهاده لكريله ارضدناها
موقف اتحتم

* * *

يا حسين انصارك إحنه وبالحرث انزيل همك
انريد دمنه يسيل بالطف من گبل ميسيل دمك
والنواظر تأبه تنظر عالترب منصرع جسمك
گبلك نضحى بكرىلا
ونحرس حدود العايله
وگطع النحر بالطف حله
ما نريد انشوف دمك يجري بالطف گبل دمنه

* * *

الكاظمية المقدسة ١٩٧٩ م

راية الإيمان

هالرايه مصباح وليل الحرب جن
وابجف الإيمان صار الها مسكن
رايه اسماء المعتقد منشوره لبدر الهواشم من علي مذخوره
وليل الحرب جن

* * *

رايه بالإيمان رفت والعزم بيها تطرز
شامحه بأوج المعالي وبالعدل صار إليها مغرز
اتوالفت ويه بطلها وصار لها ابجفه مركز
حاملها حيدر للنصر والفها من وقعة بدر
بإيمانه لها مقتدر وغيره من هالرايه يعجز
لو ردت برهان البخير تبرهن
حملتها فرسان خايه بالظن
والرايه ردت للنبي مكسوره لبدر الهواشم من علي مذخوره
وليل الحرب جن

* * *

غير حيدر ما حملها ولا عجير انطاها حگها
عشكت القائد الرايه وقائد الرايه عشگها
شمعته بيوم الحرايب وينصر دينه علگها
من حان تسليم الذمم من علي العباس استلم
رايته السادات عالأمم وايده للرايه طلگها
مجمع كرامات بالرايه حقن
وقائدها عباس بيها تعنون
اتبسم الدين برايته المنصوره لبدر الهواشم من علي مذخوره
وليل الحرب جن

* * *

ثلاثه وثمانين غزوه حيدر امشيد نصرها

رادها تواصل نصرها لچف گمر هاشم ذخرها
ورادها بيوم الحرايب بالنصر تتبع أثرها
ابھالرايه يدري حيدره يكفيها چف الذاخره
بزود وجداره ومقدره شبلة يتولّ امرها
لهالرايه چقّين گدرن يكقّن
بحملات الحروب للنصر ضمنن
چف حيدر وابنه اليتابع دوره لبدر الهواشم من علي مذخوره
وليل الحرب جن

* * *

التزم عباس القياده يا فخر أهل القياده
زم لوه الإسلام بيده وما صفح عن اعتقاده
ساميه ترفرف بإيده وضمن للرايه السعاده
رفت على صهوه رشد وبكر بلا حان العهد
قائدها بالرايه استعد وللحرب هيا جهاده
جبهات الحروب بالحرب صقّن
بچف گمر عدنان هالرايه عرفن
ترفرف الرايه وبالمجد معموره لبدر الهواشم من علي مذخوره
وليل الحرب جن

* * *

كربلا دارت رحاها وحن للعباس يومه
شاهد گباله المعاره وبالزلم ماجت الحومه
وابسمه الميدان شاف الكون متلبّده اغيومه
عباس يعبس بالوغه بيمينه لو رف بيرغه
يدحر الطاغي اللي طغه بالحرب واضحه علومه
واليحتمي بيه كلبه أيتأمن
واليثأر عليه من خوفه يحزن
يرجّف الكون بضربته المشهوره لبدر الهواشم من علي مذخوره
وليل الحرب جن

* * *

ضربة الصارم تلوك وتحله من جف الغضنفر
من يلوح السيف بيده بالوغه يرجف العسكر
من يشن عاجل حمله اتكول هذا الطلع حيدر
وسط الحرايب من وكف عن حيدر أبداً مختلف
لغيومه بالصارم كشف وزينب من تشوفه تستر
صاحت يعباس جفوني تدمن
وعمالك اليوم ظنن
وين البيطقي كلوبها المغموره لبدر الهواشم من علي مذخوره
وليل الحرب جن

* * *

من سمع زينب تنادي هاجت بحمسه الحماسه
غضب وأرعد من تمطه وكطع ارجاب الفراسه
صاح عونج يالعقيه ورايته ترف إعله راسه
وعيناچ يا بت فاطمه لو أطفني جمرات الضمه
لو أترس الجود إيدمه واكطع المي من أساسه
لازال العيال بالعطش حسن
من ينضح السيف خل أيترون
واكطع الشاطي لو طلع من طوره لبدر الهواشم من علي مذخوره
وليل الحرب جن

* * *

گمر هاشم لاح مهره وامتلك ماي الشريعه
ترس جوده ورجع لاهف رايد يروي الوديعة
والگدر جدامه حومه وطاحت چفوفه كطيعه
من الگمر طاح العلم
وعيونيه طقاها السهم
ما گدر يوصل للخيم
وظلت كلوب الفواطم ذاييه ابجمره ضمها

* * *

دمشق ١٩٨٠ م

للقاسم آيات

معرس وسبعين ألف عالگه شموعه
تنتظر من الخيم موعد طلوعه
طلع الهم محرب ابسيف وعقيده
ويدري جاسم حنته من دم وريده
ورمله تتأمل رجوعه رمله تتأمل رجوعه

* * *

جلّت الخالق قدرته الصّور الجسام صوره
وين ابن يعكوب يوسف خل يجي ويشوف نوره
مثل قرص الشمس واگف للحرب ينتظر دوره
ما بي نقص حسن الصّور لاجنّه يخدع بالنظر
مره شمس مره گمر اتعطر العنبر عطوره
اشلون شاب المقتدي بأحكام دينه
للشهاده من المهدي مفتوحه عينه
وبالتفادي منغمز والحرب عيده
ويدري جاسم حنته من دم وريده
ورمله تتأمل رجوعه رمله تتأمل رجوعه

* * *

يسحر العين التنظره لو تريد اتشوف حسنه
رشاً لو راد أيتغطرس غصن لو راد ايتشنه
ومن يميل اتگول ورده ومالت ابروضه الجنة
ورده عطر شطبة ثمر جاسم سحر كل البشر
مثل الگمر نوره انتشر والكواكب حاوطنه
من طلع من الخيم حيدر ابعينه
مبتسم للمعركة وسيفه اييمينه
وثغره ويه الصارم ايردد نشيده
ويدري جاسم حنته من دم وريده

ورمله تتأمل رجوعه رمله تتأمل رجوعه

* * *

واكف ابصدر المخيم ينظر البرج المعاره
امتوج ابهيبة محمد الحيدر يمثل أدواره
طلع مثل الحسن بمشي والوجه تسطع انواره
للتضحية ثغره ابتسم من طلع من بين الخيم
والنصر بجبينه انرسم والحرب تكشف أسرار
لبو اليمه أيمثله بالصبر جاسم
وضربة الصارم مثل بدر الهواشم
ومثل الأكبر من يشد عالسيف ايده
ويدري جاسم حنته من دم وريده
ورمله تتأمل رجوعه رمله تتأمل رجوعه

* * *

لمن اتوسط الحومه ابجالة الأكبر تذكر
التهب سيفه ابنا زوده ونار حزنه ابكلبه تسعر
صاح لو أكلب الحومه لو أوفى بثار الأكبر
صوت على صفوف الحرب لو أطفئ نيران الكلب
لو أكلب الحومه كلب ابعزم كلب وسيف حيدر
وكف جاسم يرتجز وسط المعاره
لابن عمه الأكبر ابطالب ابثاره
يريد يوم الخندق ابسيفه يعيده
ويدري جاسم حنته من دم وريده
ورمله تتأمل رجوعه رمله تتأمل رجوعه

* * *

غايتة نصر العقيدة والحرايب ما تممه
ورمله من شافت ولدها يرتجز بسم ابن عمه
نادته حياك بيني من الدليل اكشفت همّه
نعم الولد نعم الولد حاشاك تنقض بالعهد

ابجفك حُسام المعتقد لو حسم واثق اجسمه
يطفي جمر الكلب من ينضح حسامك
والشهادة ابدملك اتطرز وسامك
والمجاهد موقفه اليضمن رصيده
ويدري جاسم حنته من دم وريده
ورمله تتأمل رجوعه رمله تتأمل رجوعه

* * *

انفرد جاسم بالصفوف وشال البنود او كطعها
ولوه الجنحين او كلبها على الكلب واختل وضعها
ابرئة الصارم خطابه أو بالرمح منهج شرعها
ابسيفه الشهم أبده الوعظ الماچانت اتأدي الفرض
أرغمها تسجد عالارض أو بالرمح يحسب ركعها
من يأذن سيفه تسجدله المعاره
والوضوء إيصير من دمها التجاره
ابشسع نعله الكدر ناصبله المكيدة
ويدري جاسم حنته من دم وريده
ورمله تتأمل رجوعه رمله تتأمل رجوعه

* * *

انگطع شسع النعل منه او عالارض أحنه قوامه
او لا تگول الجرب واگف واگف ابروضه هيامه
او عین الأزدي طبرته والگدر شائت أحكامه
الjasم تصوّر منظره هلال او تگور عالثره
او بالدمه اتفايض منحره حنته دموم الكرامه
هوت فوگ الثره من العليّه الثريه
وانطففت أنوارها ابكهف المنيه
هوّه هذا الأمل هالمعرس يريده
ويدري جاسم حنته من دم وريده
ورمله تتأمل رجوعه رمله تتأمل رجوعه

* * *

هلال جاسم على الغبره طاح من برج الثريه
ورمله صاحت آه ييني بين مصابك عليّه
ريت من گبلك يجاسم كون تأخذني المنيه
يين الحسن خان الدهر
خلاني محنيه الظهر
من شاهدت جسمك وذر
اعرفت يا جاسم أروح اميسره بين آل اميه

* * *

دمشق ١٩٨٠ م

جهاد الأكبر عليه السلام

أنه الأكبر وبجهادي النصر ديني اضمنه
وصفحة الاجيال تبكّه ابفيض دمي معنونه
هذي آفاق الإمامة اتصير للمؤمن علامه
ابفيض دمي امعنونه (الله) النصر ديني اضمنه

* * *

أنه الأكبر من جهادي شرّعت نَحج الكرامه
وصفي من وصف النبوه وفرعي من أصل الإمامة
اشبه المصطفى بخلقه وخلقّه وبمنطق كلامه
بأوصاف جدي منوصف وعن النبي ما اختلف
وبالحرب أنعد بألف وشدة الصارم علامه
أرسم ابساحة قتالي صور لأهل الفاكهه
صور جذابه أبوصفها من معاني حيدر
الزود والعز والشهامه اتصير للمؤمن علامه
ابفيض دمي معنونه (الله) النصر ديني اضمنه

* * *

همّة الوجدان أصدق همّة للرايد يجاهد
ينظر الهمّة جهادي لو طلب للوصف شاهد
ابذلت للمعتقد روحي وعن سنن أحكامه ذائد
من شفت الأنصار انتهت وابدما للعز اشترت
ابحجر الشهاده من هوت بيّنت صدق العقائد
من هوت أنصار ديني للعزم سيفي استعد
وافتححت چف الشهاده وخذت سيف المعتقد
كل بطل يعرف مهامه اتصير للمؤمن علامه
ابفيض دمي معنونه (الله) النصر ديني اضمنه

* * *

موقف الحاسم يضمّن شرح منهاج البطوله

والقرار إبحكم جفني وصارمي ايضمّن فصوله
واسمى غايه اللي ردتها نصر دين الله ورسوله
تنجح الغايه الساميه لو دار كطب التضحيه
ابدم الأحرار الواعيه ترتوي فروعه واصوله
أصفه أنواع النسوغ التنطي للدين الثمر
هوه دم الاعتقاد اليجري من كقطع النحر
وللظلم يكشف ظلامه اتصير للمؤمن علامه
ابفيض دمي معنونه (الله) النصر ديني اضمنه

* * *

اسلكت درب التضحيات وأبد ما اغيّر مسيري
هذا سيف الاعتقاد ابجفي ويقرر مصيري
بالحرب رنة السيف اتصرّح ابمنطق ضميري
حاسم يمثل معتقد وايعبّد ادروب الرشد
ويّه العزم سيفي اتحد ويعجز أيكفّيه غيري
كل بطل سيفه اليمثله لو دخل للمعركه
وآنه سيفي بالمعارك سيف عزمي ايشاركه
وسيرة الحق باستقامه اتصير للمؤمن علامه
ابفيض دمي معنونه (الله) النصر ديني اضمنه

* * *

الرايد أيجاهد ابعزمه يدخل الحومه ويجاهد
الثرثه ما تنصر الحق ولا تخلي الدين خالد
اليّدعي ابنفسه مجاهد خلي دمه ايصير شاهد
بدمه يقدّم شاهده للحكّ ضميره أيردده
ولحسنين أنه معاهده اشرح ابدمي العقائد
أنه الأكبر من أجاهد عن بصيره ومعرفه
وأبد ما أنحرف خطوه عن طريق المصطفه
اقتدي ابسيرة نظامه اتصير للمؤمن علامه
ابفيض دمي معنونه (الله) النصر ديني اضمنه

* * *

اسمعه صرخة علي الأكبر وينه يطبق أقواله
ومثله يوكف بالمعاره ويفتدي النهج الرساله
اتصور الأكبر ويومه او وكفته ابساحة قتاله
يحمي ويذب عن غايته واحسب جروح الصابته
وطيرة العبدى ابهامته وشوف أبوه اشلون حاله
وامه من خيمتها نادت يا شبيهه المصطفه
والدك ناداك عكبك ييني عالدنيه العفه
وبالصبر كلبه اهتمامه اتصير للمؤمن علامه
ابفيض دمي معنونه (الله) النصر ديني اضمنه

* * *

وليله من شافت ولدها منصرع فوك الوطيه
امچفن بذاري الرمال امغسل بدم الحميه
هلت دموع المصبيه وشاهدت عكبه المنيه
ظل جسم الأكبر عالشره
وجثته ابدمه امغفره
دارت عليه الدايه
أشبه الوادم ابجده وجسمه عالغبره تغفر
من الخيم فزعت العيله تريد تنظر حال الأكبر
صدك فوك الغبره مرمي وطاح من ظهر المسفسر
زينب جييلة هالحرم
من إطلعت من الخيم
كلب ام الأحزان انجسم
شافت حسين اعله جثة الأكبر ظلوعه حناها
يصيح يا هاشم إسرعوا شيلوا هالجثه ابدماها
وينكم يهل الشهامه چبدني الأكبر سلاها
ما اكدر احمل جثته
حيلي انضهد لمصبيته

وهاشم ابهمه شالته
للخيم ودت الأكبر والحرم حاطت اتشمه
* * *

دمشق ١٩٨٠ م

من أجل العقيدة

ثوره من أجل العقيدة اموهّجه ابدم النحر
زاهره ابشعلة هدفها تحيي آفاق الفكر
غاية الیضمن رصيده ثوره من أجل العقيدة
موهّجه ابدم النحر (الله) تحيي آفاق الفكر

* * *

هذي ثورة اعتقاد انفجرت بارض الكرامه
ترفض اللي راد عرش الحكم من أجل الزعامه
تريد من دور التبيّي تظهر البيدي اهتمامه
ودور التبيّي بكل عصر أيقاده مشعل للفكر
ويفتح ابواب النصر ويشد للمؤمن وسامه
ظهر ناتج هالتبيّي اويه الفكر من ائتلف
لا مسيره بلا عقيدة ولا عقيدة بلا هدف
اليوم عاشوراء نعيده ثوره من أجل العقيدة
موهّجه ابدم النحر (الله) تحيي آفاق الفكر

* * *

شرح هذا الدور واضح اسس كل فرد اعتقاده
يسلك الحق عن بصيره وعالنفس يبني اعتماده
وكل شخص يعتبر نفسه ابذاته مختصّه القيادة
هالحاله مرآة النفس بحكم المواقف تنعكس
لكل مجتمع تشرح درس نصرة الحق بالشهادة
بالوفه الخوض المعارك ويعزمه انشاركه
وكل شخص يعتبر نفسه قائد بالمعركه
ياخذ الحگ اليريده ثوره من أجل العقيدة
موهّجه ابدم النحر (الله) تحيي آفاق الفكر

* * *

ثورة المجتمع أعظم ثوره عالظلم وطغاته

تمثل البركان لمن ينفجر يعرض صفاته
وتنشحن طاقة رجاله ابعثتها وخيراته
ومجتمع هالأمة انعرف اسلامي وابعزمه انوصف
والراد يوصل للهدف يلتزم نكران ذاته
حالة النكران ذات ا يكون بينها تتصف
وخطوه عن درب الشهاده ما نميل ونحرف
ونكسب الغايه البعيده ثوره من أجل العقيدة
موهجه ابدم النحر (الله) تحيي آفاق الفكر

* * *

اليلتزم نكران ذاته وابثقة نفسه يجاهد
ويعمل إبدوره التبي ويمضي للغايه ويعاهد
ابعزمه بين آونه وأخرى بالطليعه اتشوفه رائد
بأقدام عزمه اتشاهده راية جهاده ابساعده
وصوت العقيدة أيرده ويقتدي ابسيرة القائد
اليلهج ابصوت الشهادة عن بصيره ومعرفه
أيضوي مشعل اعتقاده ابدمه لو شافه انطفه
للنصر يعرض وريده ثوره من أجل العقيدة
موهجه ابدم النحر (الله) تحيي آفاق الفكر

* * *

أسمه غايه الانتفاضة لو بدت من الضماير
وأعلى أصوات الجهاد الترتفع من المناحر
وأروع أوصاف المجاهد واعى واعله الظلم ثاير
هاي الأوصاف الساميه تحملها أهل التضحيه
تنجح ربات التوعيه وكل وفي بإيمانه ساير
هذي أوصاف النزاهه اللي بناها المعتقد
انوجدت ابجيش الإسلام أو كتب للأمة عهد
وعالشهادة اتشير ايده ثوره من أجل العقيدة
موهجه ابدم النحر (الله) تحيي آفاق الفكر

* * *

الينظر الجوهر الثوره بكل جوانبها المهمه
أيشوف هالثوره تمد الصله لثوره أبو اليمه
ويظل سيف الاعتقاد ابكل عصر قاطع إبحسمه
اليوم الحرايب فاصله وللنصر تمشي القافله
وتبگه مواقف كربله تفضح الطاغيه وظلمه
بكل فجر عاشور يصبح والحرايب فاصله
وكل أرض من هالأراضي عدنه صارت كربله
والحرب تبگه مديده ثوره من أجل العقيده
موهجه ابدم النحر (الله) تحيي آفاق الفكر

* * *

صوره من الغاضريه اتجسّمت بأفق الحرايب
تشوف جسم حسين دامي ومنصرع بين الكتائب
وبعد موقف من عقيلة هاشم وجور المصايب
شافت شمس فوگ الثره
لاچنها جته إموذره
والگمر يم الكنطره
بين شمس وگمر ظلت تعدي والجمره ابصدرها

* * *

دمشق ١٩٨٠ م

رجوع السبايا

رجع يحسين الظعن يريد يحسبك محن
آنه زينب يبو اليمه اتكفلت هاي الايتام
گوم شوف الغاضريه أشد لو محنة الشام
رجع يحسين الضعن

* * *

يا حسين الظعن عود گوم وانظر حال ظعنك
رجع من الشام لاچن هالظعن يعتذر منك
لليسر مغصوب راح وما حضر ساعات دفنك
وأم الخدر نادتك يا والينه
أكعد ودلينه اعله كبرك وينه
هاليوم من اليسر للطف جينه
ارجعنه تدري ايبا وضع أكعد ومني استمع
يالتگول ابگطع نحري اتحملت كل المهام
گوم شوف الغاضريه أشد لو محنة الشام
رجع يحسين الضعن

* * *

من رحت عنك يسيره وأترکت جسمك مگطع
ما چنت أدري أشوفك بالكبر لو ردت أرجع
اشلون ترضه الغاضريه تصير الك يحسين مضجع
وعرش الجلاله يا شهم يتمناك
يصبح الك مضجع ويزهي بمعناك
يحسين لو تقبل أتوسد وياك
ريت يخلص هالعمر ولا يشوفوني ايسر
اميسره وعدواني تنظر إلي أبعين الانتقام
گوم شوف الغاضريه أشد لو محنة الشام
رجع يحسين الضعن

* * *

باليسر يحسين عكبك نفّدت كل الوصايه
ررفت عاليله روجي وعوّضت طيحت الرايه
انشد الراس ويخبرك باليسر راسك اويابه
شاهدي لمن چنت ألم أطفالك
وشاهدي من اتكفلت بعيالك
وكل سهم رجعت ابلب چتالك
العيله ما شافت ألم من عكب حرگ الخيم
عالحرم خيّم روجي وعوّضت حرگ الخيام
گوم شوف الغاضريه أشد لو محنة الشام
رجع يحسين الضعن

* * *

يا حسين احسب سهامك وآنه خل أحسب سهامي
وشوف آلامك الأصعب وأشد لو شدة آلامي
لو گلت مگطوع نحري جفني مثل النحر دامي
ولو گلت صوّبني الحجر بالهامه
اجبيني بالمحمل شابه بالامه
يحسين گلبك خل يعد سهامه
انصاب بالطف فد سهم وشاف من عنده الألم
لاچن آنه من الشماته اتحملت كثرة سهام
گوم شوف الغاضريه أشد لو محنة الشام
رجع يحسين الضعن

* * *

اگعد واحسب جروحك وآنه خل أحسب جروحي
وشوف جمر العطش أكثر يستعر لو جمر نوجي
والذي غيّبوا روحك باليسر غيّبوا روجي
امن الكوفه ومن الشام عانيت جروح
واليسر ما خلالي مهجه ولا روح

ومثل الخيم تستعر جمرات النوح
نار گلي المضرمه من الليالي المظلمه
اعلگت گلي للیتامه ونوّرت ذاك الظلام
گوم شوف الغاضريه أشد لو محنة الشام
رجع يحسين الضعن

* * *

گلي مثل الكمر يزهي ونوّرت ذیچ الليالي
والشمس راسك يخويه عالرمح يزهر گيالي
عالرمح مرفوع طول الدرب يتفگد اعيالي
وبالدرب طفله اعله الترب عفناها
وراسك ثگل للطفله ظل يتناها
والناس تنشد عَنكَ اسمعناها
راسمن هذا انگطع؟ وعالرمح ليش انرفع؟
جاوبتهم بالمدامع عالرمح راس الإمام
گوم شوف الغاضريه اشد لو محنة الشام
رجع يحسين الضعن

* * *

گلي بالكوفه والشام اتمسك اميثاق صبره
والخيم من وجّروها أصبحت مشعل الثوره
واحملت كل هالمصايب من أجل تنجح الفكره
يحسين اختك زينب وتدريني
ابصير الغلب نجّحت ثورة ديني
واسبيت بالشام الذي سايني
زينب أنه الصابره ومثل شخصك ثايره
امن اليسر يحسين اجيتك حصّلت أعظم وسام
گوم شوف الغاضريه أشد لو محنة الشام
رجع يحسين الضعن

* * *

يا حسين اكشف تراب اللحد واتلّكه الضعيفه
لمن اينشدوني عتّك شرد آگول حسين وينه
گوم باصريني شجاوب لو رجعنه للمدينه
وين التکفل بالحرم
ومرفرف ابچفه العلم
وفراگه أصعب كل ألم
يبو اليمه گوم وانظر حالة العيله اليساره
صوغه جابتلك اويها النصر وأعظم كل بشاره
گوم ردّها الجميل ولا تخلّيه حياره
جابتلك بشاره نصر
لا تغض عنها وتعتذر
خمد جمرها المستعر
انچان ما تگدر تردهن خلها تنحب فوگ گبرک

* * *

طهران ۱۹۸۱ م

الحسن بن علي (عليه السلام)

الليلة جبرائيل بالسماء أيحوم
ينعه روح الدين والحسن مسموم

* * *

أمسه جبرائيل ناسج مدمعه ابنار المصاب
ايحوم بالسبعة العوالي ابلهجة الآهات ذايب
وأمسه كوكب للمحاسن عن سمه الأحكام غايب
بغيايه آدم منصدع ونوح بمصابه منفجع
وأمسه الخليل بمالوضع وگلب ابن عمران لاهب
عيسى بن مريم بالحزن مضروم
للنبي يواسوه والحسن مسموم

* * *

الليلة أمست عاخالائق ليله مشؤومه ورهيبه
للغري الأملاك نزلت لاجن بحاله غريبه
تواسي حيدر بالمصاب اللي كطع جبدة حبيب
هالليله فطرس منوجل وميكال للمدمع يهل
بالحزن صمصع متصل وخذت دردائيل ريبه
دمعة إسرافيل فايضه من دموم
لحيدر إيواسوه والحسن مسموم

* * *

الليلة ليلة حزن دامس والگلب مختار بأمره
من ألم جرح اللي صابه بعد ما يمتلك صبره
شيصبر وشاهد الحور من الحزن تسجب العبره
حوى انزلت متزوعه ومريم تحن بالفاجعه
وجبدة خديجه امگطعه وآسيا ابلووعة الزهره
زينب تنادي من گلب مالوم
يواسن الزهراء والحسن مسموم

* * *

أمست الخمسه الأصول امصوّبه بمنهج شرعها
وظهر عالققرآن حزنه والسور فايض دمعها
والفروع أمست حزينه والصلاه عزّت ركعها
والحزن عالمبدأ ظهر والمصحف أيعزّي السور
حبّيد الحسن من انفطر اتغيرت الدنيه أو وطمعها
تصرخ الآيات والشرع مهظوم
والعقيده تنوح والحسن مسموم

* * *

اتصوّبت مكه الشريفه بالمصاب اللي دهاها
وبالعيون ايفييض زمزم والحجر الأسود نعاها
والشمس حثها الغروب وغده يحاربها بسماها
اويها الكواكب لايعه وغابت إبرج الفاجعه
وشمس المجد متورّعه والگمر غرّب اويها
كوكب الإيمان غرّب ابهااليوم
والشمس تنعاه والحسن مسموم

* * *

كضه نجبه بين أهله وكل إخوته احضرت يمه
مُحَمَّد وبدر الهواشم إخوته اليجلون همّه
بحجر أبو السجاد مرمي يمسح اجبينه ويشتمّه
وعياله للمدمع تصب جمره مصابه بكل كلب
لاچنّه ما مات إبغرب مثل حالة أبو اليمه
حاييم المظلوم والدمع مسجوم
وبمصابه يحوم والحسن مسموم

* * *

الحسن بالطف ريته حاضر ينظر لحال الهواشم
شابجه اعليها العوالي اموذره ابجد الصوارم
ويستمع صرخات رمله من وگع عالغيره جاسم

صاحت صوت يوليدي وقّيت رباك
بالميدان أجهّب وطيّعت عداك
عالتربان متغسل بفيض دماك
رمله شافت جسم إبنها كوكب ابين النجوم
* * *

يبي نقّذت الوصيّه مثل ما وصّاك عودك
حجّلت خيل آل اميه بدمها يالحجّلك زودك
چفوفك بدم الكرامه اتحتت وصارت شهودك
يالوصاك والدك تنصر الإسلام
ترضه اليوم أمشي للكوفه وللشام
بسي الكوم ويه الحرم والايّتام
إنته حصلت الشهاده وآنه حصّلت الهموم
* * *

دمشق ١٩٨٠ م

الكاظم حياتي وروحي

الكاظم حياتي وروحي وجروحه مثل جروحي
أرد أگعد اسحب آلام واشكيله جور الأيام
الكاظم حياتي وروحي

* * *

اتشوف كل مغرم وعاشگ لحظه ميفارگ حبيبه
ومن يغيب المحب عنه ايگول محبوبي اشيجبيه
هاي معروفه المعاني ولا تظن بيها عجيبيه
أحچي ابصراحه بلا خجل هائم الروح بهالأمل
والگلب مصيوب ابلعل وموسى ابن جعفر طبيبه
للکاظم أشکي العله وشکوة العاشگ تحله
واجبه دلالي هام واشكيله جور الأيام
الكاظم حياتي وروحي

* * *

گلي هائم بالمحبه وأرد أصارح أهل ودّي
انعجنت بهالشوگ روعي وبالمحبه عبرت حدّي
ولجل محبوبي الأحبه الناس کلها اصبحت ضدّي
لجل الأحبه اتغریت وبهالأمر ما حسبت
مثله بمصابه اتصوبت ومثل چبده انگطع چبدي
الكاظم ربیع أيامي وآلامه مثل آلامي
فارگته اکثر من عام واشكيله جور الأيام
الكاظم حياتي وروحي

* * *

عايش أيامي زهيه وگلي بالكاظم امولّع
ما افارگ روض حبه وصار إلي بهالجنه مرتع
ما چنت أدري الزمان أیخون ومن الجنه أطلع
جنة الکاظم جنتي وگضيت بيها دنيتي

والموسى أعرض شكوتي وانتظر يا يوم ارجع
يا يوم اوصل يمه وذاك الضريح اشتمه
تتحقق انه الأحلام واشكيه جور الأيام
الكاظم حياتي وروحي

* * *

يم ضريحك جنت ذايب سارح ابشوكي وهيامي
وعالبعدها اليوم تسمع لك اشكيلك آلامي
مثل ون الدوح ويّ والدمع بالجفن دامي
عالبعدها اشكي حالي يا موسى تعرف غايي
شوفت ضريحك منيتي وانتظر ترجع أيامي
أحمل مرار الغربه لاجن فركتك صعبه
وجرح الكلب ما يلتام واشكيه جور الأيام
الكاظم حياتي وروحي

* * *

ما تهمني الغربه لاجن فركتك تصعب عليّه
وردت اعرضلك شكايه وتدري يالكاظم اشبيه
وتدري چم عيله الجوارك ذايه الجمر الرزيه
چم طفله تدري وچم طفل حاير وگلبيه منوجل
وچم شاب بالسّم منچتل ومثلک اتحمل أذيه
چم ام تعنت يماك تريد الفرج واتحشمك
وآنه مثلهن منظام واشكيه جور الأيام
الكاظم حياتي وروحي

* * *

بالسجن گضيت عمرك والسجن تدري بمراره
چم موالي اليوم مثلک للسجن جابه أخطاره
تدري چم مؤمنه ومؤمن دنت ساعة احتضاره
ننتظر ساعات الفرج والنار تسعر بالمهج
يالنورك ابورحي ابتهج والگلب شيطقي ناره

للكاظم أشكي الحاله من دمعتي الهماله
وجفن المجرّح مينام واشكيه جور الأيام
الكاظم حياتي وروحي

* * *

آه يا لوعة الكاظم كلبه متقطع ابسمه
ومن كثر ثكل السلاسل من كبته يسيل دمه
ومن غضه نجه غريب وشيعته دفنته الجسمه
وجده الحسين بكريله
دم الكرامه معسله
ولا واحد اتعنه اله
جسمه ظل إعله الوطيه امچقن بذاري النوايب

* * *

طهران ١٩٨١ م

في قصائد اللطم

مُحَمَّدُ بْنُ الْحَنْفِيَّةِ

(البحر الطويل)

زينب أنه بمحمد أريد أوصفك الحاله
لمن طاح اخويه حسين رحنه بسبي الجماله

* * *

بمحمد يخويه اشلون حاله البيهه مرينه
لا وليان لا صيوان وبهالحال ظلينه
أنه ورملة وام كلثوم ورباب وليله وسكينه
لمن غابت الوليان صرنه ابولية العدوان
عليه حركوا الصيوان
واللي يذبح الوالي بعد ما يرحم عياله

* * *

بمحمد ابعينك شوف گلبي الدامي المخدّم
متصوّف الخمس جروح ما ظن بعد تتبلسم
جرح من سهم ابن كاهل گلبي برميته إتألم
العبد الله السهم صابه ويّيه أثر اصوابه
وصفّه حرمله صحابه
أبو اليمه لون مطلوب توفي الطلب أطفاله؟

* * *

وجرح الثاني بمحمد من الأول أشد وأكثر
لفاني ابطيرة العبدى الصابت هامة الأكبر
ولمن شفت عالغبره شبیه المصطفى اتكوّر
أكعدت ردت أحسب اجرّوح وروحي رافكت روحه
وچبدي اتلاهب ابنوحه
روحي امتابعه الأكبر وآجالي اويه آجاله

* * *

وثالث جرح بمحمد وسيع وما أظن يلتام

لفاني ابطيرة الأزدي الخلت بالكلب آلام
ولمن شفت بالحومه طفوا شمعة عرس جسام
طفوا شمعة اوجودي وجاسم صاح يا عودي
دم التضحية اشهودي
الوصيه ابدمه وقاها وبالطف غرب اهلاله
* * *

ورابع جرح محمد ابعين النايه اتشوفه
انصبت ابطيحت العباس لمن كطعوا چفوفه
ومشاني سبية گوم للشامات والكوفه
صواب العمد سايني ودمه اتفايض ابعيني
وسهم الشاطي راميني
من منحر گمر عدنان عين الحرم هماله
* * *

وخامس جرح محمد كلف ما ينگطع دمه
لفاني ابسهم المثلث الصوب چبد أبو اليمه
گمر دنيای چان حسين عگبه ليلتي ظلمه
سهم الصاب چبد حسين صارن بالأثر سهمين
ابگطع چبداه اگطعوا چبدين
ومثل الشمس راس حسين يزهر فوگ عسالة
* * *

محمد وحگ عيناك ما ألّمني كل الصار
هدموا على عيالي الدار روعي انبنت الهم دار
من شبوا خيمنه بنار باجدامي سحگت النار
لاچن الهظم روعي وكثر ونّي ونوحي
وعليّه هيّج جروحي
لمن شفت اخويه حسين ثنه عليه چتاله
* * *

محمد يريت اتشوف اخويه حسين لمن طاح

كل ظني تعب جسمه ونزل من علمهر يرتاح
ما ادري ابروچه أيجود وعليه حايـم الذباح
يخويه ما حسبت حساب جبهته بالحجر تنصاب
ودم نخره يصير اخصاب
ولا أدري بالمثلث الصابه وكطع دلالة

* * *

بمحمّد لون ميطيح اخويه حسين جدّامي
ما چان اهجمت هالكوم عليّه وحرگت خيامي
ولون ما ينسلب جسمه ما تتسلب ايتامي
نخره انگطع بالبتار سلبوا جثته الاشرار
والخيّرني لمن صار
صدر حسين ميدان وعليه جالت الخياله

* * *

بمحمّد يسبع الخيل ريت اتشوف ذيچ الخيل
من هجمت على الصيوان وعيالك تصيح الويل
ريت اتشوف ذاك الليل من عسعس عليه الليل
اشوف أطفال مسلوبه اشوف خيام منشوبه
اشوف الحرم مرعوبه
خلصت من النهار الفات إجابني الليل وأهواله

* * *

الكاظمية المقدسة ١٩٧٦ م

سر الله المكنون

(المهجري)

يا علي ابحكمه وجودك خالق الكون انعبد
صاح كبل الوحي سيفك (قل هو الله أحد)

* * *

يا علي من لطف ذاته الباري كوّنك جسم
ونورك من نور علمه وصرت مجمع للعلم
علي ومن رفعت علوك صاغلك هذا الاسم
وابتفاسير المعالي اسمك واسمه اتحد

* * *

يا علي كوّنك ربك من قبل نشأت الروح
وبين ساق العرش نورك زاهر ابحكمه وضوح
عين لام وياء، خط القلم اسمك على اللوح
الباري راد اسمك لاسمه أيشابجه ابعنه وعدد

* * *

يا علي من عالم الذر الك خصصنه الولاء
أوفياء وياك نبكّه بعهد حبك أوفياء
اشلون ننقض بالعهود والك شهدت الأنبياء
بعهد حبك والولاية كل نبي ومرسل شهد

* * *

يا علي لوما ولائك منغفر لآدم ذنب
ولا سفينة نوح ترسي بذاك طوفان الصعب
وجدك إبراهيم شاف كباله نار وتلتهب
قسم عالحالق باسمك واللهب منها خمد

* * *

يا علي معجزة شخصك حليه من جوهر نضيد
وانجح داود بيها من تليّنه الحديد

وحكمتك ميزان حق الوادم بيوم الوعيد
تنكشف كل الخفايه لو علن يوم الوعد

* * *

يا علي سليمان من كلب صافي هتف
ولعرش بلقيس حصّل كبل مبرد الطرف
وابّساط القدره صارت آيته ويها انعرف
غبطة اسليمان إنته ومن بحر حبك ورد

* * *

يا علي عطر الولايه ما يضاهيها عطر
من نفح روضة ولائك موسى اصبح مبتشر
سرك الصوّر عصاته افعى أكّاله سحر
نورك بطور سنين لابن عمران انفرد

* * *

يا علي أثمار حبك بدت من مربع خصيب
والرشف من چاس حبك بالدهر قط ما يخيب
عيسى لو ما رشف چاسك ما تشبه عالصليب
عيسى مثل ادريس حكمه للعله بسرك صعد

* * *

يا علي اسمك يقين الأنبياء السالفه
كل نبي ومرسل بسرك كدر يتمم موقفه
جلّت الخالق قدرته الأظهرك للمصطفه
معجزة إظهار شخصك صارت الكعبه مهد

* * *

يا علي مهبط يقينك كبل ما يهبط الروح
ومجمل الآيات وصفك والعزم مركز وضوح
اثلاثه وثمانين غزوه بسيفك تقدّم شروح
اتجسدت بيبك الأصول وذو الفقار الهن عمد

* * *

يا علي للدين عزمك ضمن هذا الانتصار
سمعه هاتف من الباري يهتف بكل افتخار
لا فتى إلاّ علي لا سيف إلاّ ذو الفقار
يا هو مثلك للاعادي بوقعت الخندق صمد

* * *

دمشق ١٩٨٠ م

الحسين (عليه السلام) كعبة الثوار

(المهجري)

حسين للتضحيه اتطوّع مو أمر حتمي انفرض
ومصرعه بعالم العلوي كباله عاللوح انعرض

* * *

حسين يلهج بالشهادة من كبل آدم وشيث
هذا مو أمر اعتباطي لا ولا خدعة حديث
الباري ناداه من تشوف الدين باسمك يستغيث
ضحى يحسين بوجودك لو شفت امره امتعض

* * *

مثل ما واعدّه الباري لأبو اليمه بعينه شاف
ممتعض دينه ويحس بمنهجه صار اختلاف
والإسلام أصبح غريب إثنين ثله من الاجلاف
اخذ كلب الدين بيده حسين ويحس النبض

* * *

حسين من شاف بحياته انخذل دين الله الحنيف
وموقفه ابين آل اميه تغير وأصبح ضعيف
للمراح وللسيوف تقدّم بنحره الشريف
وانرصده برج الشهاده وجفنه عالذل ما غمض

* * *

حسين من مكه الشريفه رصد برج التضحيات
وعرف من يسيل دمه يصير مشعل للأبابة
ثار من أجل العقيدة وأبد ما ساوم طغاة
قدّموا زينة الدنيه لقائد الثوره ورفض

* * *

رفض كل المغريات ويدري لو بايع يزيد
يصير أمر الدين قصه ومصحف الباري نشيد

لچن ثار لأجل دينه وشيّد به بقطع الوريد
عاهد يضحى بوجوده لدينه وأبدأ ما نقض

* * *

لون ما ثورة حسين الدين چان أمره انتهى
وثورته ما چان صارت مدرسه لأهل النهى
حسين واحد ماله ثاني ولا شبيه يشابهه
واليريد يخوض نهجه يدفع المنحر عوض

* * *

بكل عصر تكدّر تسير بنهج أبو اليمه الشهيد
طالما كل عصر يملك شخص من زمرة يزيد
واليريد يعيش بالعز لا يمد للذله ايد
والملك إيمان صافي من أبو اليمه اتّعظ

* * *

حسين حصّل عالشهاده وطاح بالمصرع جريح
وبالمباهل صار أعظم من اسماعيل الذبيح
اشما يطول العمر ييگه دم أبو اليمه يسيح
وشرف العالم العلوي ابنهضت لمن نخض

* * *

دمشق ١٩٨٠ م

ماذا جرى في الطفوف

انجول ميدان الطفوف واللي ما شايف يشوف
جثث متغسله ابدمها وحرم ما بين الصفوف
واللي ما شايف يشوف

* * *

شوف يالما چنت شايف حالة اعيال الرسول
أمست ابليلة الحادي عشر ماخذها الدهول
وجثث ولياها رميه وتسحك اعليها الخيول
وأمست ابدور الهواشم غايه البرج الكسوف
واللي ما شايف يشوف

* * *

شوف يالما چنت شايف جثث وبلايه رؤوس
امصرعه فوك الوطيه وتنحبس منها النفوس
وعالعواسل غدت تزهي منوره مثل الشمس
ومن دمه نحور الشهاده للسور كتبت حروف
واللي ما شايف يشوف

* * *

شوف يالما چنت شايف حال بضعة فاطمه
أمست الليلة غريبه لا كفيل ولا حمه
والكفلها اعله الشريعه مغسل بفيض الدمه
ورايته الجانت ترفرف طاحت بقطع الجفوف
واللي ما شايف يشوف

* * *

شوف يالما چنت شايف نور وجه المصطفه
يشع من غرة الأكبر لجن بالحومه انطفه
ولو ردت وصف الرسول ابوجه الأكبر وصّفه
بالحرب وجه النبوه اتخضب بدم الحتوف

واللي ما شايف يشوف

* * *

شوف يالما چنت شايف شاب بالدم حنته
تشوف جاسم عالحرايب لمن صارت زفته
ورمله من جمر المدامع وهجتله شمعتة
معرس بوسط الحرايب زفته رماح وسيوف
واللي ما شايف يشوف

* * *

شوف يالما چنت شايف طفل بالنبله انفطم
هذا عبد الله الرضيع النحره مگطوع بسهم
والرباب اشلون تنظر للوريد ايسيل دم
طفل يتغسل بدمه هذا من جور الصروف
واللي ما شايف يشوف

* * *

شوف يالما چنت شايف جسم ذايب بالألم
وانظر السجاد لمن حركوا اعليه الخيم
أيشوف خيل وعده ونار التحيط ايتام وحرم
حاير بجمع اليتامه وغارت عليه الألوف
واللي ما شايف يشوف

* * *

ما شفت ليلة الحادي عشر بالحومه ظلام
شفت بس أنوار تزهي وتنشع من جسم الإمام
وبزغ من برج الشريعة كوكب يشع للايتام
يعوّض عهود الكفاله واخذ عاليله يطوف
واللي ما شايف يشوف

* * *

قم يا أبا الفضل

(موشح)

إجّت زينب والضعينه اويها گوم يا با الفضل واتلگاها

* * *

يعباس اندفنت اويك الجفوف اكشف اتراب اللحد وانحضر وشوف

هاي زينب عوّدت لرض الطفوف تشكي آلام السبي لولياها

* * *

هاي زينب هاي عد گبر الحسين تنشد السجاد وتشويح العين

اتصيح دليبي بگبر عباس وين إخته ما تنسا وما ينساها

* * *

وأسمع السجاد ناداها بدمع عالنهر عباس تدريه منصرع

اوياه زينب إجّت ليك بيا وضع أيهيّج جروحك وضع ممشاها

* * *

زينب اتعنّت الكبرك معوله للنهر مهرعه اويها العايله

تدري باختك منك اشتمأمله گبل جابر تسرع الملكاها

* * *

فوك گبرك هوت يا عباس هاي زينب وباصرها عالايله براي

اتگلك أرد أحچيلك شسوّت عداي حگها تشكي اليوم جور عداها

* * *

ولمن شخصك عنها بالطف إنحجب ورأس أبو السجاد عالرمح إنّصب

امحيمك حرگوه والخدر إنسلب ولليسر تالي الشمر ناداها

* * *

نادتك صار اليسر يا با الفضل ابرگبة السجاد من حطّوا الغل

عگب ذیچ الهييه لنها اعله الهزل ونوت للكوفه العده بمسراها

* * *

حال زينب صار من حالك أشد والشماته أمضه من سهم وعمد

باليسر تدريها طبت چم بلد وتدري چم طاغي ابغنف حاجاها

* * *

وأشرف إعله الكوفه ظعن العايله بالشماته الناس إجت تستقبله
اعلینه كلها بالحقه متحامله وحصل ابن زياد التمنها

* * *

وأدخلونه عليه وشاهدنه اللعين وگومه كلها ابشرته مستبشرين
صاح اخذنه ثارنه بدم الحسين وهاي زينب علي اسبينها

* * *

وحگ راسك يعباس اتقدمت ليه وبهمه وجداره اتكلمت
گتله أنه بثار اخوتي اتوزمت ونجحت الثوره اللّی فجرناها

* * *

خاب ظن الطاغيه ورد للشم ينظر الراس الحسين ويبتسم
گتله مجد حسين لتظن ينهدم هاي عزه وبالدمه شرينها

* * *

ونشد عالسجاد لن جاوبه بصوت انفوس أهل الدين لتظنها تموت
ويبگه دم حسين صيحه بلا سكوت وبالشهاده الغايه حصّلناها

* * *

عگب ما خابت أمانتيه وجزع ومن الشام كتاب لجوابه رجع
ومن الكوفه الظعن متوجه طلع وبنصرنه الكوفه غادرناها

* * *

حال مسره الظعن تدري اشلون حال جايره الحدايه ونخيفه الجمال
وأدمت الركبة السجاد الأغلال والحرم سوط الشمر يبرها

* * *

من وصلنه الشام شنوصف الشام چم شمر بيها لگينه وچم فُطام
الشام أهلها متابعه اليعبد أصنام بعيد وبزهوة فرح شفنها

* * *

الها لاحت روسكم من عالرماح يزيد من أعلى القصر مبشتر صاح
العيش طاب لآل اميه بارتياح من لسانه الصيحه سمعناها

* * *

إنغمر بالنشوة وتغطرس بالنصر اتصدر المجلس أمير ومبتشر
أظهر أحقادته وتبجح بالكفر وگال وقعه بدر عادلناها

* * *

بينه أمر وأدخلونه المجلس وراح يتماده ابرج بتغطرسه
اعتمد لاسلوب التحدي يمارسه وللبهواتنكر لدعواها

* * *

صار إلي دور الچنت أتامله وحصلت الوكفه الأخيره الفاصله
ثورة حسين البدايه بكريله وباليسر للشام وصلناها

* * *

صحت صوت ومنه ابن هند ارتعد بين اكالة الأكبار إشبعد
چتل إخوتي واليسر وعد وعهد والعهود الدين وفيناها

* * *

إصحه من نشوتك واسمع يا يزيد حسين نجحت ثورته بگطع الوريد
حسين حي ما مات ميموت الشهيد ودولتك بالثوره أنهيها

* * *

عگب چتل حسين أيامك عدد يا يزيد وتنظر الشملك بدد
اعليك دور الدايه ورايك فند وبنصرنه الدنيه كرمناها

* * *

حال أميه وأمره للناس انفضح وابته السجاد بالخطبه وشرح
غاية الثوره أو وصل گصده ونجح وبخطبه الناس وعيناها

* * *

من الشام لكربلا انوينه الرجوع وصلنه واعله گبوركم نهمل دموع
للمدينه اشلون لو رده الطلوع خويه لعيالك ترد ترعاها

* * *

الكاظمية المقدسة ١٩٧٧ م

يا فرج الله

(موشح)

اعيوته ادمع الصبر فياضه والمجد ظلت محله ارياضه

* * *

تظل تجري اعيوته ادمع الصبر وندي بهالصبر حصّله الأجر
خدّرت أفكاره أحلام العمر نحس بالذل وعليه نتغاضه

* * *

الصبر عالذل عار دنيه وآخره والاعذار أضغات نوم وثرثه
الما طلب حگّه نصيبه المسخره ولو حجه الوادم تحور ألفاضه

* * *

بالصبر نتحجج ومّرت سنين نغض عن الواجب ومتخاذلين
النه غايب دوم اله مستنهضين وما نأدي واجب استنهاضه

* * *

لو صدگ نستنهض ونبدي العتاب للإمام ونشتكيه من الغياب
ايكون گيله للحرب نفتح الباب بالسيوف اللامعه الوماضه

* * *

خل نكف ادموعنه وخل نستعد وخل نلم هذا الشتات ونتحد
من دمانه انروي دوحات المجد وللعهد نثبت صدگ حقاظه

* * *

مجد عدنه محلت ارياضه ويريد نسكي أرضه الطيبه بدم الوريد
حسين ما وصانه بس نلعن يزيد ونحفظ التاريخ باستعراضه

* * *

أبو اليمه لمن استبسل وثار وبهدر دمه ضمن هالانتصار
راد دوم انتابعه بهذا المسار ومثله لأهوال المحن خواضه

* * *

حسين لمن طاح بالمصرع جريح بصوته چان ودمه يتحدّه ويصيح
المسلم المتمايله هبة الريح مجد دينه إعله الحرب حرّاضه

* * *

والذي يمجّد شرف يوم الطفوف بالفكر خل يدخل الحومه ويشوف
سبعه وثمانين تتحده الألوف وبالوغة لبذل النفس ركّاضه

* * *

الكاظمية المقدسة ١٩٧٧ م

مصرع العباس (عليه السلام)

(موشح)

الْكَمَرُ عَدْنَانُ الْعَمَدِ مِنْ صَابِهِ خَلَّهَ زَيْنَبُ بِالْخَيْمِ مَرْتَابَهُ

* * *

مِنْ عَكْبٍ مَا أَمَنْتَ حَالَ الْعِيَالِ وَسَكَنْتَ رُوعَ الْحَرَائِرِ وَالْأَطْفَالِ
لِلْكَفْلِهَا أَطْلَعْتَ تَشْكِيْلَهُ الْحَالَ وَبِالدَّمْعِ رَادَتْ تَضَمُّدُ صَوَابِهِ

* * *

مَعُولُهُ اتَّعَتَتْ لَصُوبِ الْمَشْرِعَةِ وَرُوحَهَا بِمُضْمِ الْمَصِيبَةِ مَرْوَعِهِ
بِالصَّبْرِ وَالْحَلَمِ زَيْنَبُ مَدْرَعِهِ وَرُوحُ زَيْنَبُ لِلْمُضْمِ مَتَهَا بِهِ

* * *

أَشْلَوْنَ وَكَفَّهُ أَوْكَفَتْ يَمَّ شَاطِئِي النَّهْرِ حَائِمُهُ أَتَدُورُ عَلَى جِسْمِ الْكَمَرِ
تَدْرِي مَتَشَمَّتْ بِوُكُفَّتِهَا الدَّهْرُ وَاعْلَهُ زَيْنَبُ كَشَّرَتْ أَنْيَابَهُ

* * *

وَصَاحَتْ بِصَوْتِ الْكَطْعِ مِنْهَا الدَّلِيلُ وَبَيْنَ جِسْمِكَ يَا مَنْ لَزَيْنَبُ كَفِيلُ
الْتَفَتَتْ وَشَافَتْ كَمَرُ هَاشِمٍ چَتِيلُ وَالْعِلْمُ دَمُ الْقِيَادَةِ خَضَابُهُ

* * *

لَمَنْ شَافَتْ حَالَهُ أَلْهَا الْيَسْرَ لَاحَ وَمَنْ صَمِيمُ الْحَزْنِ كَلَبُ الْحَرِّ صَاحُ
يَا لَبْنَيْتِ الْخَدْرَ ذَاكَ الْخَدْرَ رَاحَ مِنْ هَوْتِ فَوْكَ الثَّرَى حَجَابُهُ

* * *

مِنْ إِكْطَعُوا چَفِينِكَ وَطَاحَ الْعِلْمُ إِنْ كُطِعَ بَيْنَهُ وَطَاحَ صَيَوَانُ الْحَرَمِ
وَأَنْطَفَتْ نَارُ الظُّمَةِ وَكَلْبِي أَنْضَرَمَ بِجَمْرِ نَارِ خِيَامِكَ اللَّهَّابِهِ

* * *

مِنْ لَهَيْبِ الْخَيْمِ وَالْأَمِّ الْحَزْنِ مَصْوَّبٍ وَمِلْتَهَبٍ كَلْبِي الْمَمْتَحِنِ
وَحَكَّ عَيْنِكَ يَا كَمَرُ مَا چَنْتَ أَظُنُّ تَصِيرَ عَيْنِكَ هَدَفَ لِلنَّشَابِهِ

* * *

وَالْعَمُودُ الْفَضْخُ بِصَوَابِهِ الْجَبِينِ حَنَهُ ظَهَرَ اخْتَكَّ مِثْلَ ظَهْرِ الْحُسَيْنِ
أَمْدُوهُنَّهَ وَأَتَلَفَتْ يَسَارَ وَيَمِينِ وَصَحَّتْ تَوَّهَ الْكَدْرِ حُلَّ مَصَابِهِ

* * *

العمد آه العمد خلاني أحوم بكريله وأنخاك يا عباس گوم
لون ميصيبك فلا تهجم الكوم وللخيم ما توصل السلاّبه

* * *

إعتلت فوگ النهر صرخات المصاب وألّمت عباس زينب بالعتاب
اشا تحشّم ما يرد الها الجواب الها بس الصده يرد اجوابه

* * *

دمشق ١٩٨٠ م

يوم عاشوراء

(موشح)

اشلون يوم اعله النبوه وآلها من طحت يحسين فوگ رمالها

* * *

اشلون يوم اعله النبوه اشلون يوم البيه جسمك عالثره تغسله دموم
بمصرعك روح القدس محزن يحوم ينعه روحك واوحى ما اوحاها

* * *

اشلون يوم البيه جدك ينظرك دمك ابترب الطفوف ايعفرك
ابعينه چنه ايشوف حزت منحرك وجتتك شمر الخنه اتتناها

* * *

اشلون يوم الماجرہ بين الرسول اخرس لسان الدهر عنه شيگول
صار صدر حسين ميدان الخيول جالت ومحد العنك حالها

* * *

اشلون يوم مصاب وافجع كل مصاب واللي صابك بي كلب والدك ذاب
اشد من يوم الذي بهامته انصاب ومثل دمع امك دمعته الهاها

* * *

اشلون يوم اشلون حالة فاطمه الراسها من نحرك تخضبه بدمه
عاليتامه بالمصيبه المحتيمه وعگبک لزینب تشارك حالها

* * *

اشلون يوم آلام واحزان ومحن بمصرعك يحسين مصروع الحسن
مثلك اوداجه على اثباجه اشخب من انرفع راسك على عسّالها

* * *

اشلون يوم وزینب اتشوفك ذبیح گوم وادرك حالي بين امي تصيح
طلعت اتظنك یو الیمه جریح وعلى صوت النخوه تتعناها

* * *

اشلون يوم وشبلک السجاد تم بین شدّة حالته وسلب الخیم
اعليه واعله العايله العسکر هجم اشلون جوله وبالمخیم جالها

* * *

اشلون يوم وغيّر اوضاع الزمان لبست الدنيه عليه ثوب الأحران
دمع واشجان ونحيب بلا هوان والأرض بي زلزلت زلزالها

* * *

الكاظمية المقدسة ١٩٧٥ م

استنهاض وعتاب

(موشح)

يا شمسنه الزاهره الوضّاحه ليل هجرك ننتظر مصباحه

* * *

يا شمسنه الباسراير مطّلع بظاهر الوادم أبد ما تنخدع
هاشمي فرعك وأنزه كل فرع ورده من طيب الأصل نقّاحه

* * *

يا شمسنه الغاييه إترج الصبر يمته هالمهجران ييزغله فجر
نار هجرك بالضمائر تستعر ودمع فكدك للجفن جراحه

* * *

نعتب وهالعتب ندري ما يفيد بالعتب جرح التخزنّ ما يهيد
إشما نزيد الصبر محنتنه تزيد وأدمت الجبهات لطم الراحه

* * *

أكبدنه من الظلم آلام ومحن وإلك بالمحجوب كلها اتوضحن
وچنها الأرواح من الأبدان إبرحن وهالارواح من الصبر برّاحه

* * *

إحنه للظالم فسحناله المجال وتالي صرنه انصيح يا ذله الحال
الما يسوگه المرضع وطيب الخصال بالعصي ما ينضمن إصلاحه

* * *

ندّعي ودعوانه من نسج الخيال عدنه إيمان الذي إيهز الجبال
الجلد كلبه ومؤمن يخوض الأهوال ويدخل الحرب ويجول الساحه

* * *

غرگنه بالأوهام من كثر السدوج وإنحجنه إبضمينه وذلة الموج
اسفينه الما تهم بملاطم الروح ترمس من تكثر الملاحه

* * *

لون نتكاتف على حكم الطغاة ونمد گبل سيوفنه انخور المماة
ابد ما ننصاب ضيم بهالحياة ولا يكثر الظلم سود أشباحه

* * *

ولو صدگ نثبت جداره وتّحد نوصل ابوحدتنه ذروات المجد
لچن كل واحد ابرايه مجتهد وأصم أبكم عن حچي النصّاحه

* * *

ندّعي ثوار لاچن بس إسم نسينه ثارات أبو السجاد الشهم
إبنهج أبيّ الضيم يمتّه نلتزم وناخذ ابثاراته من ذبّاحه

* * *

دمشق ١٩٨٠ م

علي الأكبر

(موشح)

ليله صدّت للمعاره ابعينها اتصيح جثه علي الأكبر وبينها

* * *

اطلعت من خيمتها محنيه الظهر عالمعاره ابعينها شبحت نظر

ليله عن الأكبر اتريد الخبر والدمع متفايض ابجفنيها

* * *

فاجده اصبي عينها وفاضت العين والدموع اتصيح الأكبر طاح وي

لن تشاهد بالحرب واكف حسين ويمّه جثة الأكبر اموذرينها

* * *

وشافت حسين أعلى جسم الولد طاح يبني عالدنيه العفه المظلوم صاح

وغده أيوسّم شيبته ابدم الجراح واعله حال حسين زاده ونينها

* * *

حسين لمخيّمه وجّه صيحته لن يشوف ابهمّه هاشم حضرته

شار عالأكبر حسين وشالته للخيم بالجثه متعنيها

* * *

لقوا متعنيها وهيّه اعتنت ليه واعله الولد مصيوبه انحت

بالسعاده فازت امك وأمنت من اوهبت دمك لنصره دينها

* * *

وانته أول گمر من هاشم تغيب يبني بالفردوس خل عيشك يطيب

ومن تطب للجنه وابدملك خضيب الزهره من دمك تخضب جبينها

* * *

ليله من طبت الفسقاط ابورع صابره وحتى الصبر منها جزع

ما تحسّب ليله شاب الها انصرع لاجن التحسّب بأمر حسينها

* * *

على صواب الهام دمع الأم جره التحسّب أمر حسين لو شح ناصره

ينذبح ويطيح مرمي اعله الثره وتنظرم عالعايله اصواوينها

* * *

فوك ابنها اوكت ليله ونادته هاشم لجسمك يالأكبر شالته
والدك يا هو اللي يحمل جثته لمن اتحيطه العده صوبينها

* * *

يني حالة والدك للصم تذيب وسهم المثلث لدلاله يصيب
وييگه جسمه اخضب ابدمه وتريب وعگبه ليلها امغربه وسابينها

* * *

الكاظمية المقدسة ١٩٧٥ م

فراق علي الأكبر

(موشح)

ليله بالخيمه حزينه اشبيها حسين لو الأكبر يعز اعليها

* * *

اشبيها ليله الودعت أول شباب علي الأكبر من بعد جمع الأصحاب

خافه اعله الولد من طعن الحراب تريده من الحرب يرجع ليها

* * *

اشبيها ليله امكابه وجه الحسين تنادي اخبرني عن ابني صار وين

وأبو اليمه اعله الحرب شايح العين گومي يا ليله اندعي ايناديها

* * *

طبت لخيمتها محزونه اهتفت حره يا رب ليك باللوعه لفت

هالغريبه لدمعة الغربة اذرفت وقسمت اعله الله بصبر واليها

* * *

يا الهي اوليدي الأكبر رده لي ابجاه صبر حسين وبغربة هلي

مثل رجعت يوسف ارجعلي علي جروح گلي ابشوفته ايداويها

طلعت من الخيمه مفجوعة گلب تنهض وتعثر وماخذها الرعب

لن تشوف الولد رد من الحرب ابفرحة المنتصر متعنيها

* * *

نادته ادريك ملهوف ارجعت تريد تتوادع عگب ما ودعت

امك أنه وبدماك اترعت روح بيني لركبتك ضحيها

* * *

ياالعزیز حسين من عندك أعز لچن عن صبره الصبر عيّه وعجز

حين لك بالهومه بن غانم برز صاح شده وصار الأكبر بيها

* * *

روح صبرلي ابوك وأمنه واطلع لحومتك وامرح بالمنه

مثلي چم حره بولدها مدوهنه ويحي ليها حسين ويسليها

* * *

حكه ابوك الدمع من دم يذرفه وعجبك ينادي على الدنيه العفه
حيث بيك أيشوف جده المصطفه واته لوصاف النبي حاويها

* * *

اتعنه الأكبر للحسين ايودعه أيصبره لفكده وينشف مدمعه
عكب ما ودعه اتعنه لمصرعه ساعه لن لجثته اموذريها

* * *

الكاظمية المقدسة ١٩٧٦ م

أنا زينب

(موشح)

آنه زينب هاك إخذ اخباري يالتناشد ليش دمعج جاري

* * *

آنه زينب أنه بت سيد المله أنه بت سر الحمد والبسمله

آنه مجدي عالجد زاد وعله أنه جبرائيل خادم داري

* * *

آنه زينب أنه بضعة فاطمه عالمه من أصلي ما متعلمه

آنه نوري يشع لعنان السمه وتزهى من نور الهدى انواري

* * *

آنه زينب من ثدي العصمه ارضعت أنه بحجور الكرامه ترعرت

آنه من أصل النبوه تفرعت ومن نسغ طيب إرتون أثماري

* * *

آنه زينب عالنساء إترجحت أنه يوشاح البتول إتوشحت

آنه من عالم الذر ترشحت وخدت من سر الجليل أسراري

* * *

آنه زينب ولرسول الله أنتسب والأصل هاشم وعبد المطلب

وبالمصايب أم الأحزان انحسب ويّه الحسين اقترن تذكاري

* * *

افتحت عيني وشفيت ضلع امي انكسر وراس أبويه بمسجد الكوفه إنطبر

وبمصاب الحسن صوبيني الدهر لجن بعده مرتفع شنياري

* * *

بزود اخوتي مرتفع شنيار إلي وينتخولي بالعقيله اتدल्ली

بخرچ وبالدين وصّانه علي وزود اخوتي مصدر استبشاري

* * *

ومن عكب ذيچ المعزّه والدلال تالي لن أنظر اخوتي إعله الرمال

چنت مكفوله وصرت أكفل إعيال والدهر صاح إعلنت اخطاري

* * *

حسين لو ما يفضخ جبينه الحجر وسهم المثلث يصيبه بالأثر
ما عليّه اتخيم أخطار الدهر ونار اميه ما تشب ديارى

* * *

وراسه عالرسال لو ما يرتفع ما تصل للخيم غارات الجمع
ولون چفين الكمر ما تنقطع خدرى ما ينسلب ويّه استارى

* * *

وگمر هاشم من هوه اعله المشرعه وشفّت چفين الكفاله مگطعه
اظلمّت الدنيه ولفتنى الفاجعه وما أميّز ليلي من نهارى

* * *

الكاظمية المقدسة ١٩٧٧ م

حنان رمله

(موشح)

اويك كلب امك برز يا ريعه ومثل جسمك بالحرب تغطيعه

* * *

اويك للحومه كلب رمله برز ومثل صوتك بالميادين إرتجز
منشرح للموت ما عيّه وعجز وصار مثلك عالحرب تطويعه

* * *

اتطوّع أيلازمك وابعهده التزم أمل عنده وعالأمل شد واحترم
غال عن جسام خل اكشف الهم هالفرع من الحسن تفرّيعه

* * *

الفرع إنته والحسن هوّ الأصل وهالفرع من الأصل ما ينفصل
اويك للمصرع يجاسم متصل وبايح المظلوم نفس البيعه

* * *

خل اعطر جعودك بدمعه العين وخل أفترج خاطري بصبر الحسين
بيع دمك واشتري عزّه الدين ولا تصدّع عمّك بتوديعه

* * *

ولمن اتودّعه وتسفر عالحرب لا تفكّر ودّعت رمله بغرب
كبلّك اعله الموت ودّيت الكلب ومن عزم كبلّك كسب تشجيّعه

* * *

واعله سيفك يولدي شد اليمين ما يموت إلّما دما يرتوي الدين
بيني خلّد مجدك بمجد الحسين وهالخلود إحتذر من تضيّيعه

* * *

لا تضيّع مجدك وخطّه بدماك وساوي علّين الجنان بعلاك
على لسان حسين صوت الحق دعاك إشما يكلف الثمن كون إتطيعه

* * *

امطالبه بدمع الربّه ودر الثدي توفي لو للموت ملهوف اتعدي
امك وعاهدت لحسين افتدي وهالعهد دمك حبر توقيعه

* * *

يبيني حَيَّيْ جَفُونَك بدم الصواب وتظل شمعهُ موهجه بدرج الشباب
تعيش بالأفكار من بعد الغياب نَحج قرآني بأصل تشريعه

* * *

ريت أبو السجاد يرخصني بأمر اويك أطلع للحرب وافدي العمر
لاجن المعهود أناصر باليسر واليسر أصعب واشد ترويعه

* * *

الكاظمية المقدسة ١٩٧٨ م

حسين مني وأنا من حسين

(موشح)

چبد أبو اليمه السهم من صابه صوّب إيجبد الرسول اصوابه

* * *

عگب ما ودّع أبو اليمه الحرم وطلع آخر طلعه من بين الخيم

إخذ وطر المرجله ولن السهم صاب چبده وما خط صوابه

* * *

حسين بصواب السهم بالچبد حس وأشد من طعن الرماح السهم مس

أحنه صدره فوگ كربوس الفرس ودمه صوابه لوجهه صار اخضابه

* * *

السهم مض وصار مطالاعه الظهر وچن المحتّم لبو اليمه سدر

جبهته مفضوخته بصواب الحجر وبعد بس سيف الشمر طلابه

* * *

صاح بسم الله ومله الجف بدمه صابر ومحتسب وارما للسمه

نزل للمصرع بأصاويب وضمه وعينه ظلّت شابجه أعله أطنابه

* * *

شاهد العسكر عالخيم هجم صاح يالما إلکم اذمام وشيم

اگصدوني ولا تروعون الحرم وللخدر لا تهتكون إحجابه

* * *

والشمر جاوبه حگك هالطلب وطلّع الجيش التوسط بالطنب

وللجريمه السيفه من غمده جذب إشلون سيف اللي الشمر جدّابه

* * *

سيف شر والشر يلوح ابصاحبه وابن سعد لهالمهمه نادبه

الگطع منحر خامس أصحاب العبه رگه صدر ابن النبي وما هابه

* * *

فوگ صدر حسين أثنه ركبته وللذبح وسّط السيف برگبته

الراس فوگ الرمح زينب شافته ويّه رسه تلوح روس أصحابه

* * *

عالمخيم آكبلت غارات الخيول من خيمهن طلعن بنات الرسول
شافن إعله حسين خياله تحول وچقنه المصرع بذاري ترابه

* * *

إطلعت زينب من خدرها المنسلب شاهدت حرگ المخيم والنهب
مثل نار البالمخيم نار الكلب نار ما تطفه وبكت لهابه

* * *

الكاظمية المقدسة ١٩٧٧ م

والعصر

(موشح)

يا سُورَ الأحكام يا آياتها يمتّه تاخذ للسلف ثاراتها

* * *

يا بقيّة هاشم البيك الأمل يا أصل (حي على خير العمل)
الناس ردت تركع لعزّه وهبل ولبست الذلّه حسب مرضاتها

* * *

وشيعتك متلدّعه ابجمرّة النوح وما حصل بيها اليعمّر عمر نوح
جسوم تنظرها لچن ما بيها روح والاحياء اتساوت اويه امواتها

* * *

يا عمود الدين يا ركن اليقين طلّسم اسمك وسر الله المتين
ليمتّه نضل نحسب شهور وسنين واللي تشكي من يحل شكواتها

* * *

ما يحل شكوه الحبيب الله الحبيب ومحد أيداوي العلل غير الطبيب
واهم الكال السهم يخطي ويصيب عدانه ترمي وما خطت رمياتها

* * *

يا طبيب العلل علتته النفاق والفتن عدنه الذّ من كل مذاق
والشعار اللي نحمله الانشقاق واللي تنكر تبگه هيّه وذاتها

* * *

وين ميميل الهوى ويا نتّجه وكل زمن نظهرعلى الشاشه بوجه
والذي اتصلّح خطئنه وتنتبه انگول هذي خاطئه ابنظراتها

* * *

نرفض اللي توگف اعله المرتفع حيث تعرف كل زوايه المجتمع
وتعرف الناس التعيش إعله الخدع وتكشف الدنيه وسُبل غاياتها

* * *

العدو واحد واحنه آلاف الرجال لچن يا وسفه نعيش إعله الخيال
لو صدگ أحرار ندخل للقتال وللمعارك نلتزم راياتها

* * *

يا طبيب إنريد للعلّ شفه وبعد ما يحوج مرضنه انوصفه
چفك بيا يوم يأخذ مرهفه ويرد للأمه زمان الفاها

* * *

ننتظر صوتك من الكعبه يصيح الوعد حان ويا لثارت الذبيح
وينضمد كل كلب من عدنه جريح وترتفع من شيعتك أصواتها

* * *

اشمحلّه من تهتف بثارات السلف اليوم عن الغاضريه مختلف
وبعده دم حسين لسا ما نشف واليتامه ما تجف عبراتها

* * *

دمشق ١٩٨٠ م

البدور الهاشمية

(موشح)

هاشم إيدمها تغيب نورها جسومها امغسله ابفيض انخورها

* * *

هاشم أمست بالطفوف بأشد حال الروسها عن الجسوم السيف حال
كؤوضت والسلب عكب الأهل حال بالخيم والعهده اتزايد جورها

* * *

وانسلب خدر الحرم عكب الحمه وراح خدر العايله وراح الحمه
ابغرب ظلن والكلب منهن حمه على الحومه البيها مهوه ابدورها

* * *

امسلبات اطلعن ضجن بالنده صاحن العهدك ييو اليمه نده
لاجن اللي طايح ابولية نده بالظليمه اعداه تاخذ دورها

* * *

يا حمانه چنه بحماكم ولن إجموع چتالتك لعيالك ولن
ولا كلب حن على أيتاماكم ولن والفواطم سلّبوها اخدورها

* * *

بالهظم زينب لبو اليمه اوصلت وروحها جالت إبلهفتها اوصلت
بيد خوّتها ومدامعها اوصلت جروح أبو السجاد عزها وسورها

* * *

وظلّت إعله الثره ابناظرها ترب شافت اخوتها الصريعه اعله الترب
نادت الغريه الحرايركم ترب والمصيبه عكب أهلها اتدورها

* * *

وكلب زينب للنهر مسرع عده يشكي حال العايله وجور العده
الساعدك چقّك ييو فاضل عده واجلي حزن العايله من صدورها

* * *

عابت عباس زينب وأملت غرّيتي وطاحتك بالطف والمّت؟
والعهده للحرم عكبك والمّت هزل متعوبه ونخيفه اظهرها

* * *

اشلون مرّ انهار بيه اشلون مس عالقواطم والأطفال ابخوف مس
وجمر نار امخيمك والعطش مس اكلوبها وچفك مصب ابخورها

* * *

گوم باصري لون صار اليسر وبالظعن ليسر چتالك يسر
حالي لابن ازباد والشامت يسر وتحيي عيد الظفر وسط اقصورها

* * *

الكاظمية المقدسة ١٩٧٧ م

الزهاء (عليها السلام)

حرت وعيوني ما ينشف دمعها
صدگ أم الحسن كسروا ظلّعها
أريد أتجاوبوني أريد أتجاوبوني

* * *

وگفت ابّاب ام الحسن مختار
أريد أنشد بعد ما ظلت أفكار
صدگ محسن وگع يم عتبة الدار
والزهره ابصدرها نبت بسمار
وروحى حسّت اليوم ابجزعها العقيدة بيا وضع أمسه شرعها
أريد أتجاوبوني أريد أتجاوبوني

* * *

سؤال وعلى لسان الكل تردد
بت من فاطمه مو بت مُجّد؟
ليش الطاغية اعليها تعمد
وابرمياته عالإسلام سدّد
تصيح أشلون حيدر ما سمعها وهوّ الضمد للزهره ودرعها
أريد أتجاوبوني أريد أتجاوبوني

* * *

أشلون أهل الغدر والكفر والشر
ظلع أم الحسن منهم تكسّر
من طاح الطفل چاوين حيدر
ما يدري أظن بالنار تسعر
وروحى اتناشد ابلوعة فزعها صدگ هالثاني للوادم خدعها
أريد أتجاوبوني أريد أتجاوبوني

* * *

ظلع الطهر حين الرجس رضّه

صاحت صوت وتنادي يفضّه
محسن وكع وحشايه تلضّه
رگد حيلي بعد ما بيّه نخضه
وفضّه تنادي واتغیر وضعها ليش الوادم التزمت بدعها
أريد أتجاوبوني أريد أتجاوبوني

* * *

احتارت فضّه من سمعت الزهره
تشكي من الظلع وآلام كسره
اوگفت يم فاطمه تسجب العبره
وگلبها بعد ما يمتلك صبره
وصوت النايه لفضّه صدعها المكيده ابصورة الناس اشطبعها
أريد أتجاوبوني أريد أتجاوبوني

* * *

دم عيوني فاض إويه المدامع
من هالوادم التهوى المخادع
وحيدر بالغصب اخذوا يبايع
السقيفه أسست كل المطامع
اتعنّت للوصي ابدافع طمعها وهاي التفرقه يا هو جمعها
أريد أتجاوبوني أريد أتجاوبوني

* * *

تگيّد حيدر من الدار بأنجاد
أوبعده گيّدوا رگبة السجاد
هالأصفاد تشبه ذبيح الأصفاد
من چتّفوا رگبة زين العباد
وچفوف الغمر يا هو الگطعها زينب عن أبو اليمه أشمنعها
أريد أتجاوبوني أريد أتجاوبوني

* * *

الشأن الأعظم

يا علي شأنك ما كدر واحد يوصل لأسراره

* * *

كل مغرم ايوصف حبيبه باسلوب المحكم انشراحه
بعالم أوصافه لوسرح كلبه ايدوب بوردة ملاحه
وأنه انغمز لمن اوصف المحبوب احجي ابصراره
يا علي شأنك بوصفك العكلي حيرت افكاره

* * *

لو حانت الساعه وتدور الراحه والراحه راحه
بكوتر ولأئك راحة أهل الراحه والراحه راحه
واللي هوى يراحم تصافح راحه ما ترد راحه
يا علي شأنك سلك النجاة ومنهجك تياره

* * *

من يوصف العاشق نتيجة إحساس منبع غرامه
ومن الولايه اتناولت أطيب چاس چاس الندامه
معزم تراني وخل يلوموني الناس كل الملامه
يا علي شأنك بهجة دليلي ومصدر استبشاره

* * *

كوثرك ما يحصل الذ من مايه والرحمه مايه
بحر العزم بسمك تلاطم مايه يا عزم مايه
وينحرم منه العن طريقك مايه من سوه مايه
يا علي شأنك بالشدد هوّ اللي يحامي جاره

* * *

يا بحر جود الباري والعالم صار قطره بوجودك
وأنت بسرادق عرشه تسطع أنوار شعله ورودك
والمرسلين ارشفت چاس الأسرار من بحر جودك
يا علي شأنك ابعرش الجلاله تزدهر انواره

* * *

يا وصف ذات الخالق وذاتك نور افق المعالي
من نور علمك هاي الأكوان تنور وسيع العوالي
جنّني حبّك يا علي وفكري يدور بعالم مثالي
يا علي شانك خلّه العوالم بالوصف محتاره

* * *

يا أسم الأعظم يا جلاله حرفه أسراره حرفك
أتحفك ربك من لآيء وصفه وانعشك وصفك
ونفسك انصاغت من جواهر لطفه وازدهر لطفك
يا علي شانك بحر اللطف والأنبياء أثماره

* * *

يا بهجة الطور الزهت من سيناء واضح سناها
وروحك براها الباري كبل الأشياء من مبتداه
وجوهرة روحك من كنوز العلياء ربك حباها
يا علي شانك وربك صهر ذات القدس واختاره

* * *

يا ثروة العلم الإلهي المكنوز ابكنز الجلاله
ومفتاح هالكنز ابيقينك مغروز وبيك امتثاله
هاي الرتب محدّ كدر إلها يحوز غير الأصاله
يا علي شانك غصن المحاسن والرسل أثماره

* * *

يا طالعة شمس المجد والتقديس تزهى ابصفاتك
لاهوئي وصفك للمعالم تغريس ابدورة حياتك
وزهرة علومك أزهرت بالرسريس والثمر ذاتك
يا علي شانك عبّد طريق النهدي بآثاره

* * *

يا علي بمبدأ جنبه شفته المضمون قول الرساله
ما يعرفك غير أنه وخالق هالكون رب الجلاله

واليدخل ابروضه ولائك مأمون ابطيبة خصاله
يا علي شانك ميزان حق المجتمع وأخياره
* * *

دمشق ١٩٨٠ م

الثورة المحمدية

ثائر ابروح الإيمان بالثوره شرح القرآن
أفكاره مهبط جبريل بالغازية التأويل
بالثوره شرح القرآن

* * *

ثائر واهداف الشرع أهدافه
مجموعه أوصاف الرسل باوصافه
وثقل النبوه ارتكز فوق اكتافه
وأهدافه تبعد عن رمي الهدافه
حكم الكتاب ايمنه والنصر لاح ابعينه
يحكم المحكم التنزيل بالغازية التأويل
بالثوره شرح القرآن

* * *

حج واعتمر واهمته شد اظعونه
وسورة التوبة تجسمت بعيونه
وانصاره أهل المجد ساروا دونه
ميمونه صاحوا ثورتك ميمونه
من مكه طلعا ثوار من اهل بيت وأنصار
عن سيرة الحق متميل بالغازية التأويل
بالثوره شرح القرآن

* * *

ثائر ولمن حان موعد مسراه
أربع أوصاف الظعن سارت وياه
العقه بشماله والمجد عن يمناه
والنصر صار ابوجه والعز بكفاه
بها الظعن مجموع الدين من الآله التعيين
حادي الظعن ميكائيل بالغازية التأويل

بالتوره شرح القرآن

* * *

اسرار هذي التوره جوهر مكنون
وابسورة الإخلاص شرح المضمون
صفوه وبأحكام الشريعه ايحكمون
يوم الغنايم للنصر يغتنمون
رسموا درس للأجيال من شرح سورة الأنفال
خمس الغنايم تكميل بالغازيه التأويل
بالتوره شرح القرآن

* * *

من حلت بأرض الشهاده الثوار
ركعوا وسجدوا للعزير الجبار
ونصبوا خيام المخدرات المختار
وبالرايه راعي الرايه ضارب استار
دركت الحرّ الغايه يحميها راعي الرايه
ويرجف اصحابه الفيل بالغازيه التأويل
بالتوره شرح القرآن

* * *

قائد الخطه ثورته راسمها
ناده بحبيب الميمنه اتسلمها
وصاح بزهير الميسره اتقدمها
وقائد الرايه الرايته ايكلمها
هالرايه ماضيها يعود والصارم ايصير اشهود
يمطر حجر من سجيل بالغازيه التأويل
بالتوره شرح القرآن

* * *

من بعد القاء الحجج عالعدوان
للحرب دخلوا منها شيب وشبان

رفعوا أباطراف الرماح الميدان
وخمسين منهم هوت فوگ التريان
والقائد ابدمها يشوف للمصحف اتخط احروف
ورثة الصارم ترتيل بالغازيه التأويل
بالثوره شرح القرآن

* * *

لمن هوت بالحومه كل الأنصار
للمعركة اتقدم شبيه المختار
وبعده الهواشم غدت تاخذ ادوار
وثائر الدين استوحده الأشرار
من انصرع عالتريان كملت حروف القرآن
دم النحر ليش ايسيل بالغازيه التأويل
بالثوره شرح القرآن

* * *

دمشق ١٩٨٠ م

مصير الأمة

يحسين الحگ اویاک للدين اتضحی ادماک
بأیامک شفت الوادم منجرفه لصوب الظالم
والظالم يتحداک یحسین الحگ ویاک

* * *

مو ملحمة شاعر نضمها بأقبال
ولا مدبر ومن خوفه ينسه اثما گال
لاچن نريد انسیر ویّه الأجيال
وندرس أحوال الناس عاهلالمناول
ونشوف الناس اشلون عالحق من ینگلبن
ونسמע اصوات الوادم چم صوت یريد الظالم
وشچم صوت الناداک یحسین الحگ ویاک

* * *

خل نبدي من يوم الغدير ونسمع
خطبة الهادي ونبتدي من المطلع
ونشد أمر هالأمه المن ودّع
وچم واحد الأیّد خطبته وبايع
یحسین وتدری شصار لمن راح المختار
راح الحگ وتشريعہ وانقضت ذیچ البیعه
وحیدر تدری اشوصاک یحسین الحگ ویاک

* * *

یحسین ذاک الجمع چنت اتشوفه
نفس الأشباح إتمثلت بالكوفه
وغایة مکیدتهم الک مکشوفه
والکوفه باوصاف الغدر موصوفه
من اتخونک لتلوم هالگوم ابناء الگوم
واللی اتأید ظالمها من اتخونک شیهمها

لو حاربت العاداك يحسين الحگ وياك

* * *

يوم الغدير وكرىلا نفس اليوم
وما تختلف هالكوم عن ذیچ الكوم
بالنبل من یرمون جسمك لتلوم
نفس السهام الرمت نعش المسموم
انضمت ذیچ الاحقاد واتبينت بالأولاد
والابن یطلع حاقد گول السر من الوالد
والباطل ما یدناك يحسين الحگ وياك

* * *

يحسين إنته الما تساوم إنته
للطاعي ما يوم بأمر داهنته
تصريح بلسان الشرف صرّحته
للظالم الیركن یبيع آخرته
وين الیفهم شتگول وایطبّق بالمعقول
ویترك ناس المنصاعه للظالم والأطماعه
وچّفه ایصافح یمناك يحسين الحگ وياك

* * *

يحسين من شفت العنید اتجبر
وبالكوفه ثبّت قاعده گوم الشر
بالقوه چان اتبايعه یتصور
ما یدري انتھ لثورتك تتنظر
من عادات الثوار ما تدعن للاخطار
لنصرة غايتها اتجاهد وما تخلف من اتعاهد
هالاوصاف ابعناك يحسين الحگ وياك

* * *

يحسين الشیدت ركن الإسلام
ابفیض الدمه وهدّمت عرض الظلام

موقفك خالد بالدهر والأيام
بذكراك تتمسك وأبد ما ننظام
فوك الاخطار اندوس للدين انضحي انفوس
يللي ادرسته ابمنهاجك ودمنه ايفيض بأوداجك
انخلد بالدم ذكراك يحسين الحگ وياك

* * *

يحسين أول قائد انتہ عرفناك
تنذبح وابدملك تخلد ذكراك
واحنہ المشينه ابنهجاك وعاهدناك
بهاي المسيره آخره ودنيه اويك
دمنه أيردد انشاد ما نخلف بالميعاد
ثائر وايعاهد ثائر ما يسلك درب الجاير
دوم انسير ابمسراك يحسين الحگ وياك

* * *

الكاظمية المقدسة ١٩٧٨م

دستور العقيدة

هالحوفه دستور تتوهج إبنور
واشما تجور الأيام ما تطفه شمعة جسام
تتوهج ابنور

* * *

دستور سر التضحية لو نبدي باستعراضه
انشاهد حروفه امطرزه من دمومها الفيّاضه
دستور يزهر بالمجد ما تضمحل ارياضه
أسراره تظهر من كلب هالمعرس بأنباضه
من تزهى بالكون اتوضّح المضمون
وتفسير سرها بأحكام ما تطفه شمعة جسام
تتوهج ابنور

* * *

لو كترست فكرك على هالتضحية وغايتها
اتشاهدها صوره منوره إبشمعة وفه صورتها
واللي رسمها ابخوفته شاب وضمن عزتها
من الوريد المنقطع تالي ارتوت روضتها
بالدمه الفيّاض اتوضّح استعراض
هاذي عروض الإسلام ما تطفه شمعة جسام
تتوهج ابنوره

* * *

كثره المواقف تحتوي من مطلعها التغطية
وكل موقف يحتّم رسم يتجسم ابتنويته
لو رذنه بيها نبتدي خل نبدي من توديته
چم كلب لمن ودّعه بوداعه نشّف ريعه
وشچم كلب ذاب من جمر المصاب
واشما تزيد الآلام ما تطفه شمعة جسام

تتوهج ابنور

* * *

شاهد أقباله البجيمته حوفة عرس منصوبه
من ودّع أمه ابضامره جمرة حزن منشوبه
يعرفها رمله ابيا سهم متلوّعه ومصيوبه
عمك يجاسم نادته صيحه ابدمع مصحوبه
خل نسمع امه اشوصته ابعمه
ابدم هامتك خط وسام ما تطفه شمعة جسام

تتوهج ابنور

* * *

بيني يجاسم نادته هاك اخذ دمة عيني
توصفلك اعهود المضت ما بينك وما بيني
جاوبها أعرف غايته وشرايده توصيني
وصّاني كلبج والدي افتدي بروحي لديني
وصاني عودي ابذل جهودي
من ينهدر دم الهام ما تطفه شمعة جسام

تتوهج ابنور

* * *

أدّه المراسيم وحمل وابجفه زم خطّافه
ودكّرها بعهود السلف للّي نست أسلافه
وعن جده حيدر بالحرب ما تختلف أوصافه
ولو كبرّ ابوجه الزلم تتراجف السيّافه
من هاي الأوصاف يرجف السيّاف
إجمرة الصارم ضرام ما تطفه شمعة جسام

تتوهج ابنور

* * *

چف الشهاده إمتد إله وحصل على اللي راده
شرف الكون ابغايته وقدسية استشهاده

وثغري امه بافراح وحزن يترددن انشاده
واعديني جاسم بالوفه وما أخلف ابميعاده
من نار الدموع علكت إله شموع
تضويلها ابدت الشام ما تطفه شمعة جسام
تتوهج ابنور

* * *

كربلاء المقدسة ١٩٧٨ م

الندبة الجارحة

طيحت گمر عدنان هدمت بيتي
خدر الحرم مفگود من ضربة العامود
هدمت بيتي

* * *

آنه العقيله الصابره المفجوعه ابطيحت كفيلي
وچفين اليه اعله النهر مگطوعه ابطيحت كفيلي
وگلب الحرم يا هو اليسكن روعه ابطيحت كفيلي
عالنهر لمن طاح حارس ثنيتي
صار النزل فرهود من ضربة العامود

هدمت بيتي

* * *

لمن شفت جثة كفيلي بلا راس صوبت عيني
ونيلة الصابت عين أخويه العباس صوبت عيني
شوفت خيمنه الظلت ابلا حراس صوبت عيني
عهد الأخوه ايكون أحفظ وصيتي
ما ظن زماني ايعود من ضربة العامود

هدمت بيتي

* * *

يا گمر هاشم صحت والروح اتحوم يم الشريعه
وسدت عالتربان گلي المالوم يم الشريعه
نام ابدليلي انجان ينهالك نوم يم الشريعه
ابمصرعك روعي اتحوم تعرض شجيتي
ونشفها سهم الجود من ضربة العامود

هدمت بيتي

* * *

حان المگدر يا گمر هاشم حان بالغازيره

وگوس المنايه اتوجّه اعله الصيوان بالغازيه
نیشن سهم وابعيني طاح النيشان بالغازيه
أنحب وأحاجي العين گولي اشنوي
جاوبت دمعي أيجود من ضربة العامود
هدمت بيتي

* * *

اتصوّبت عيني وما أوجد بالعين منكّطع بيّه
أقسم ابكّطعت منحرك والچفين منكّطع بيّه
وين الیدلّيني النهر دربه امنين منكّطع بيّه
حاميه بهالوديان وگريت منيتي
ودرب السقايه اشهود من ضربة العامود
هدمت بيتي

* * *

والحرم طلعت مهرعه من الصيوان يا گمر هاشم
وتصرخ أطفالك وين ساقبي العطشان يا گمر هاشم
وگلي تفرّ من حنين الرضعان يا گمر هاشم
وأسمع كفيلي ايصيح زينب وفيتي
وانگّطع حبل الزود من ضربة العامود
هدمت بيتي

* * *

العامود يا لوعة اصواب العامود ابدرب السقايه
لو ما يصيبك ما انگّطع حبل الزود ابدرب السقايه
ورایتك ما چان انطوت فوگ الجود ابدرب السقايه
ابسهم اللي طقه العين صارت رزيتي
وشفت الرزايا السود من ضربة العامود
هدمت بيتي

* * *

الصمود أمام الرزايا

انه زينب وخل يشهد زماني ويدري شجَم سهم بالطف رماني
مرامي الغاضريه شفت بيها المنيه

* * *

يدهري صوبتني بأربع سهام
سبي وغربه ومنايه وحرگ الخيام
واسهام الشماته إشلون تلتام
وابشفرة أحقادك وذرتني ومثل چثة علي الأكبر غدتني
طعناتك البيه شفت بيها المنيه

* * *

هيهاات أرضخ لحكمك يدهري
وشدّيت الكلب بحزام صبري
وبنيت العقّه فوگ أستار خدري
لو شفت الدمع من عيني ساجم تفايض من نحر بدر الهواشم
واجفوفه الرميّه شفت بيها المنيه

* * *

زينب يا دهر تشهد الأيام
إشما تحرب عليّ هيهاات أنظام
ابوسط گلبي علگت شموع جسام
وابچبدي إنصبت العرس حوفه وابدمه اعجنت حنة چفوفه
واشموعه الزهيه شفت بيها المنيه

* * *

أنه زينب صفت الأحزان عيدي
ونبلة حرمله حرّت وريدي
مثل جيد الطفل طوگت جيدي
من شفت الطفل يم امه مذبوح الجسمي ما بگت لا مهجه لا روح
والعلّه الخفيه شفت بيها المنيه

* * *

إعرفت يا دهر عاليله اشسادي
من رد المهر يصهل ينادي
الظليمه اللّبي سبت عيلة الهادي
ابسرجه الخالي چّتي اليسر شفته يگلي حسين فوگ الغبره عفته
يزينب هالرزيه شفت بيها المنيه

* * *

على التل اوگفت واحنيت الظلوع
صحت يحسين گوم ورد الجموع
ورخصت يا شهم من عيني الدموع
بس الصده ينابيني من أهتف حرت مدري دمع لو دم أنشف
والونه الشجيه شفت بيها المنيه

* * *

أدري الدهر متشمت الجالي
لمن سال دمعي الجان غالي
خلاني زماني ابغير والي
وأشد كل ناييه وكل هاي الآلام رحمت ميسره للكوفه والشام
وعياي السيه شفت بيها المنيه

* * *

دمشق ١٩٨٠ م

اليوم الخالد

هذا يوم حسين واليناصر وين
يستعد للمعركة هذا يوم حسين

* * *

حسين لمن صاح يا بني هاشم
ودّعوا العيله وجردوا الصارم
الگوم يردونه انبايع الظالم
جاوبوه ابصوت نستعد للموت
والطريقك نسلكه هذا يوم حسين

* * *

لا نبايعهم ما نمد الايد
نذبج وياك لا نصد لا نحيد
مثلك بما اليوم للشهادة انريد
هالعهد معهود الك كلنه جنود
ونصرتك موتهلكه هذا يوم حسين

* * *

وسمعت الأنصار كل حديث حسين
اجتمعوا ونادوه إحنه متهيئين
للحرب دونك الك منتصرين
ابفجر موعده للرب رده
والأمر نتداركه هذا يوم حسين

* * *

لن گمر هاشم صاح يا لأنصار
احنه نتقدم للحرب لو صار
جاوبوه اشلون؟ علينه يصبح عار
انتم اتضحون؟ بالبدايه اشلون؟
أول إحنه انشاركه هذا يوم حسين

* * *

إحنه نبديها وارتفع هالصوت
ننتظر فرصه وبعد خاف اتفوت
نريد نستشهد ما نهاب الموت
واحنه موعودين ننتصر للدين
والجهده ايباركه هذا يوم حسين

* * *

وانتدب عباس والعلم بيده
صاح ويّه حسين مصرع انريده
واللي ما يلوي على الذل جيده
اويانه للحومه انه محتومه
والأعادي الهالكه هذا يوم حسين

* * *

صاحوا الأنصار يا كمر عدنان
هذي حومتنه والمبارز حان
نريد بامر حسين ندخل الميدان
واحنه ميهمنه نفتدي ابدمنه
والمواقف حالكه هذا يوم حسين

* * *

دخلوا الحومه ونصروا الإسلام
بدمهم النازف كتبوا الأحكام
ابموقف الأنصار تشهد الأيام
هذي نصرتهم هذي صرختهم
للضمير إتحرکه هذا يوم حسين

* * *

الكاظمية المقدسة ١٩٧٨ م

مواقف زينية

چم مصاب گلي انصاب شاهده ابدمة عيني
من عفتك اعله الغره وكمّلت دور الثوره
چم مصاب گلي انصاب شاهده ابدمة عيني

* * *

بين امي يالبيك الشيم محتقه هاك اخذ عتي خل يصوبك عتي
زينب انه الشدت وسام العقه من صبر گلي چم مصاب بگلي
والشرف بأوصافي تكمل وصفه يشهد لي ربي وبه اعلم ربي
والاسلاف بمالوصاف بالغامه امتوجيني
من صبر امي الزهره كمّلت دور الثوره
چم مصاب گلي انصاب شاهده ابدمة عيني
يحسين اخذ من جرح گلي المدمي حالة الخدر من سبوا هالخدر
بجور النوايب شاركتني ابهمي گلي المفطر عاليتمه اتفطر
حال اليسر عالحرم اصبح حتمي سارت بهالبر يا كطيع المنحر
والايتام بالآلام لمن تحس تاذيني
ابگلي احمّلت چم جمره كمّلت دور الثوره
چم مصاب گلي انصاب شاهده ابدمة عيني

* * *

يحسين أخذ من دمعي وصف السجاد النظر الحاله حالي يشبه حاله
من ثگل اغلال اليسر والأصفاد تدري شجراله كطعوا دلالة
ما شايفه عيوني عليل وینگاد لشدة اغلاله دمعي الهماله
والسجاد من انگاد بالنایبة یناديني
حیرني شبلک بامرہ كمّلت دور الثوره
چم مصاب گلي العناب شاهده ابدمة عيني

* * *

يحسين أخذ من جمر دمعي الهمال چلمة معاتب والشهم يتعاتب
لو راحت اخته ميسره بذاك الحال بالأخص زينب يا معزة زينب

للكوفه لمن وصل بينه الجمال گلي المصوب بالشماته اتصوب
من إنشال عالعسال راسك غده ايواسيني
وبالسي لحالي ينظره كمّلت دور الثوره
چم مصاب گلي انصاب شاهده ابدمة عيني
* * *

طول الدرب راسك يلوح گبالي وجهك اوصافه المصطفه باوصافه
وانسينه بالبر واحد من اطفالي والظعن عافه اعله الترايب عافه
والراس ظل يتلفت اعله عيالي للطفل شافه ثگل لمن شافه
ابلم عيال وجمع اطفال طول الدرب تلگيني
وحزمت گلي بصيره وكمّلت دور الثوره
چم مصاب گلي انصاب شاهده ابدمة عيني
* * *

من دخولنه المجلس الطاغي وراڊ الراسك يشوفه بالشماته يشوفه
بصير الگلب هدمت عرش ابن زياد ابطبت الكوفه اگلبت وجه الكوفه
بالحزن خليناها عگب الاعياد الطاغيه بخوفه انفطح ناتج خوفه
والطغيان بالخسران والنصر صار الديني
ما بين بسمه وعبره كمّلت دور الثوره
چم مصاب گلي انصاب شاهده ابدمة عيني
* * *

لمن وصلنه الشام وادخلناها ادينه موقف ما يجاڊيه موقف
ثورتك بارض الشام كملناها بايماني اهتف للمظالم اكشف
والخطبته السجاد من اڏاها خطبته توصف ظلم اميه توصف
بذاك اليوم يا مظلوم اسبيت الذي سايني
وردت لك منتصره كمّلت دور الثوره
چم مصاب گلي انصاب شاهده ابدمة عيني
* * *

الوالد على سر أبيه

هالآبناء عالآباء والگوم أبناء الگوم
هذا الظلم من يومه الطاغي العصر لتلومه
هالآبناء عالآباء والگوم أبناء الگوم

* * *

يا سعد من گلبی تفيض عیونی وتعرف انباضي من تجس انباضي
يا ریت كون الوادم أیخلونی اكشف الماضي والأساس الماضي
لاچن أخاف الوادم أیلومونی والقاضي راضي شتحي ویه الراضي
من الاجداد للأولاد تقبل تعيش ابذله
وبعیونهم مرسومه الطاغي العصر لتلومه
هالآبناء عالآباء والگوم أبناء الگوم

* * *

يا سعد اخذ الحذر من هالطغیان واضح ظلمها ومنكشف ظالمها
چم أخرس بأخرس حجه بلایه لسان محد فهمها والطرش تفهمها
لو ما تمد چفك ابلگ الشعبان ما تذب سمها والهلاك ابسمها
حذرناك نبهناك واطرش چنت بالزفه
صفحاتك المشؤمه الطاغي العصر لتلومه
هالآبناء عالآباء والگوم أبناء الگوم

* * *

ابحكم الظلم تقبل البجة مظلوم تحجي ابشجاعه والضعف بالطاعه
والجهل بعیونك یواهم مرسوم الجاهل أطباعه ما یغیر أطباعه
لو چنت تقره الممحي چالیش الیوم بالچلمه ساعه اتبع ابتاعه
من الظلام ما تنظام لو چنت لازم دینك
های العبر مفهومه الطاغي العصر لتلومه
هالآبناء عالآباء والگوم أبناء الگوم

* * *

لو چنت متبصر بأحكام الدین تجعلك فاهم لو چنت ما فاهم

جان اعرفت سيرة حياة الطاغين چم طاغي واهم والأله العالم
من عهد غصّاب الفدك والهاخين شوف المظالم بالدهر چم ظالم
بهذا اليوم وبكل يوم اهل الظلم مكشوفه
ابنظراتها المسمومه الطاغي العصر لتلومه
هالابناء عالاباء والگوم ابناء الگوم

* * *

وجّه اسماعك يا سعد للتنصيت واسمع الهادي من خطاب الهادي
ما اوديه مرسل مثل ما اوديت كلبه الينادي مو لسانه ينادي
والهظم بعده اتحوّل بأهل البيت تعلم اشسادي بأهل بيته شسادي
والمختار يدري شصار بناتج حسد هالأمه
حللت سفك دمومه الطاغي العصر لتلومه
هالابناء عالاباء والگوم ابناء الگوم

* * *

اول ظليمه السدت عگب المختار لوعة الزهره يا مصاب الزهره
والطاغي ذاك اللي دفع باب الدار مكشوف امره بكل زمان اتنظره
والهادي يدري ابدفعة الباب شصار المصطفه ابگيره حزن واهوه ابگيره
كسر ظلوع وفيض دموع وآل النبي بحالاله
متلوّعه ومظلومه الطاغي العصر لتلومه
هالابناء عالاباء والگوم ابناء الگوم

* * *

وزينب من امها استارثت هالألام شافت مصايب ما مثلها مصايب
ابچتل أبو اليمه حافظت عالايتام والگلب لاهب عالحرم متلاهب
من كربلا مسببه راحت للشام والچبد ذايب بالمصايب ذايب
والأطفال بالأهوال متصدعه ومرتابه
انظر يزيد وگومه الطاغي العصر لتلومه
هالابناء عالاباء والگوم ابناء الگوم

* * *

لو ردت تسلم من ظلم هالطغيان الزم أيمانك تنجح بإيمانك

والروح من ينسلب منها الإيمان يفشل كيانه لو كصر سعيوانك
ومن تلتزم نهج الشهيد العطشان تكسب ضمانك والصبر ميزانك
والبركان عالطغيان فجّره ابصرخة زينب
وبدّد سواد غيومه الطاغوي العصر لتلومه
هالابناء عالاباء والگوم ابناء الگوم

* * *

دمشق ١٩٨٠ م

ليلي

(تجليه)

يالأكبر زمانني بيك صوبني وغربني عكب عيناك غربني

* * *

تغربت وكطعت الأمل يا رجواي يا وردة حياتي الراحته بحشاي
لو چان الدوه ايطيب الجرح والدادي أنه جروحي تطيب ابشوفتك ييني

* * *

كلبي ابشوفتك تتلايم جروحه وترد للجسم روحه يا بعد روحه
يضني العين عيني عليك مشبوحة اگولن بلچي لأمك تجي متعني

* * *

تتعنه ويرد ذاك الدلال الراح يا مصباح عيني الفاجده المصباح
لمن طحت بيت اللي عليه طاح إو ونّ الدوح ما يختلف عن ويّ

* * *

أوننّ والدموع تسيل من دمك گوم وشوف حال امك يبعد امك
يريت تراب گبرك يولدي الضمك من گبلک يالأكبر كون إلي يضمني

* * *

يضمني ولا أظل أنحب على فرکاک شملحه الموت ييني لو يصير وياک
تضمن أنساك يالأكبر فلا أنساك الله يطيب جرح السوط من متني

* * *

ما أنساك لمن جرح متني ايطيب يا رفعة الراس اللي غزاه الشيب
الذخر لو چان عند الموزمات يغيب چا لمن ذخرتك يالغبت عني

* * *

غبت عني وحرمت عيوني من ضيک يا کاسر وجودي الفاجده فيک
شجاوب من ينشدوني أهل حيک اگولن بالشدد غاب التكفلي

* * *

تكفلي وطلعت ابشيمته وبجماه وبساعة الشده اتفارگت وياه
الخالاني وحيدة إعله الترب خلاه وصابني مرامي الهظم صابني

* * *

مرامي الهظم صابني وبكيت أحبي انقطع قلبي ابكطعتك يا ثمر قلبي
يا شمعة وجودي الذايه ابعثي أكثر العتب لو أدريك تسمعي

* * *

تسمعي وترد يوليدي ليته ردود يا صيوان خدري الفاجد العامود
يگولون الصبر لأهل الصبر محمود محنت الصبر والصبر محنتي

* * *

صبرت وروحي ولها تريد منوها وشفت ام الفصيل تسيل عيناها
تقابله ونحن كلمن على اضناها النوب ام الفصيل إجزعت من حيي

* * *

من حيي اجزعت وبكيت وحدي هناك احزن وانتحب يالأكبر لفرگاک
گوم وشوف عين امك تهل ادماك ما أنساك الله المحن ينسني

* * *

أنسه وما أگولن ضيعة ضيعة يا ريع الگلب عگبک نشف ريعه
ومثلک بالبواتر صار تگطيعه ومثل جسمک سيوف الهظم وذرتي

* * *

وذرتني إو ولمهن ما أظن يزول الله ابشوفتك يدعج يحلو الطول
محن فرگاک هم اتزول يا مدلول لو للکبر يالأكبر يودنني

* * *

کربلاء المقدسة ١٩٧٨ م

اين الكفيل

(درامي)

يا كطعت الجفين كطعت أملنه
وأبطيحت العباس سلبوا خيمنه

* * *

قائد وضحه الروح لجل العقيده
وكطعت جبل الزود كطعت وريده
وأبجيتته الايتام چانت سعيده
وأبفگده صاحت وين كافل أهله

* * *

من فرت الايتام بالغازيه
وهجمت على الصيوان غارات أميه
والحرم صاحت وين أهل الحميه
من شوفت العباس دهري حرمنه

* * *

البدر الهواشم جيت اعرض شكايه
من طاحت الجفين طاحت الرايه
ومن غابت الأرواح ابكهف المنايه
ذاك الزمان الراح ما يرجع النه

* * *

هم صدگ يا عباس يرجع دلالي
والطيه بالامال ترجع عيالي
ريتک عدل وتشوف محنة اطفالي
ابگلب اليتامه اليوم زادت الوته

* * *

واتصل هذه الصوت من الوديعه
للي بگه مطروح فوگ الشريعه

چفینه یم الجود ظلت کطیعہ
وعکب الکفیل الیوم محد کفلنه

* * *

ما حصل راعی الزود یا من ایتامی
عکبک ولا نغار یحرس اخیامی
زینب انه وضلیت عنهم احمی
وچم محنه هذا الیوم عکبک حملنه

* * *

لو ردت یا عباس احسب اجر وحی
یتمرد الدلال من جمر نوحی
روحی بگت ویاک رجعلی روحی
لو ترجع الایتام لدیار اهلنه

* * *

ولو تعتذر وتگول سهم البعینی
چم عهد یا عباس بینک وبینی
ولو ما تطفی الیوم جمره ونینی
طفیلی نار اضماي حرکت گلبنه

* * *

من جمرة النارین گلی تألم
نار الضمه والنوب نار المخیم
انته الگلت هالجود ینترس بالدم
چا وین عهدک وین تنسه عهدنه

* * *

عوف الکفاله عوف آنه الکفیله
حاشاها هالایتام تطلع ذلیلہ
ولو شفت دمع العین فایض مسیلہ
ردت اطفی یا عباس جمرة عطشنه

* * *

طهران ۱۹۸۱ م

الأصوات الهادره

(دارمي)

تنادي الشهاده اليوم واتريد اهلها
وين اليضحي الروح ويسارع الها

* * *

وين العلن دعواه مؤمن موالى
لو سمع دينه انضمام يرخص الغالى
مو إله دينه يصيح منضهد حالى
التفكك المحبوب تمشي برجلها

* * *

وين اليضحي الروح لجل الشهاده
وبدمه يمللي حروف طرس اعتقاده
اليزرع وفه بدنياه يشوفه بحصاده
واليسعي للخيرات حتماً يصلها

* * *

وين الوفي وللدين يبذل جهوده
وما يغفه جفنه بليل يحرس حدوده
ولو شئت الأقدار يرخص وجوده
ولو ألف موته يموت عالحق حملها

* * *

المتطبع اعله الخوف واضح بيانه
وبجبهته مطموغ ختم الخيانه
ولو سمع باسم الموت تنسد اذانه
يمكن نسه الأرواح كلمن أجلها

* * *

يفوز اليحط الموت بملاگه عينه
ما يشتري دنياه وايجلي دينه

واشما يجور الحال يثبت يقينه
ولا تطربه الأوهام برنة حجلها

* * *

واجب عليه اليوم نطلع انقاتل
من أجل حق الدين نرفض الباطل
سألوا أمير الكون من هو العاقل
قال يضع الأشياء كلها بمحلها

* * *

العاقل يضع الأشياء كل شيء بمحله
يقتدي ابنهج الدين يرفض الذله
ومن ثورة المظلوم كل حق تجله
حسين أيعرف هالناس ويندل عللها

* * *

شوف أبو اليمه اشلون عالطاغي من ثار
بالسبعه وثمانين ذاك النصر صار
سبو طعش أهل البيت وسبعين الأنصار
ولو احنه أهل الدين نصبح مثلها

* * *

دمشق ١٩٨٠ م

علي بن الحسين (عليه السلام)

ما أنسه يومك يا جتيل العبره
طول العمر يومك يظل إعله البال يا جتيل العبره

* * *

آنه العليل الفطرت كلبى الآه والعلّه الخفيه
اتغيبت روجي من النحب والويلاه والوتّه الشجيه
ما حصل واحد من هلي حتى انخاه برض الغاضريه
بمالغريه وحدي يا جتيل العبره
وحيرني يوم العاشر إجتمع عيال يا جتيل العبره
ضاغت ابروجي الواسعه بذاك اليوم والكدر والفها
مره اعله جسمك مره عالشاطي تحوم والحزن خاطفها
يوم الفكدتك بيه راواني هموم ما چنت شايفها
خضبت وجهي يا جتيل العبره
ابدم الضحايه ودمع عيني الهمال يا جتيل العبره

* * *

ما چنت شايف هالحن والآلام برض الطف شفتها
واتمركزت بعضاي كل الاسقام چم علّه حملتها
واسعرت روجي بنار دمع الايتام والروحي فكدتها
ابگطعت وريدك يا جتيل العبره
كل ساعه يتراوالي وجه الجمال يا جتيل العبره

* * *

ما چنت شايف گمر يهوى اعله الكاع من كلب الشريه
عالنهر هذا الوصف شفته بأبداع من راعي الحميه
للحرم من عالشاطي يرسل إشعاع لآفاق الثنيه
هالگمر عمي يا جتيل العبره
والشمس راسك زاهر إعله العسال يا جتيل العبره

* * *

ما چنت شايف وجه جدنه المختار متخضب ابدمه
شفته إبوجه الأكبر اليسطع أنوار من بهجة الحكمة
ابجثة أخويه اعله الترب تدري شصار من أشرار الأمه
گطّعوا جسمه يا چتيل العبره
وطبرات الأكبر گطعتلي الدلال يا چتيل العبره

* * *

ما چنت شايف معرس اعله الحومه والسمر زفته
بالطف شفت جاسم ابفيض دمومه بچفوفه تحنه
وشمعة زفافه ابچيدتي مضرومه وزيدتلي الوئه
عرسه المنيه يا چتيل العبره
اتغيرت زفة عرسه من حال لحال يا چتيل العبره

* * *

ما چنت شايف طفل ضامي ومذبوح والنبله بوريده
من دمه صوابه دمع عيني مسفوح وآلامه بعضيده
نبلة ابن كاهل خذت مني الروح من طوگت جيده
ابذبحت رضيعك يا چتيل العبره
أنشد اميه شچان ذنب الأطفال يا چتيل العبره

* * *

ما چنت شايف خيم تتلاهب نار بس خيم أيتامك
نار اللّي چانت لاهبه اباب الدار اتحوّلت لخيامك
وگوم الطغات الكيدوا حامي الجار شاهدت جدّامك؟
يسرّوا زينب يا چتيل العبره
وگيدوا جيدي بنفس ذيج الاغلال يا چتيل العبره

* * *

غريب بغداد

انصابت أصول الدين بمصاب راعيها
راعي المعاجز وين واتوجرت نارين
بمصاب راعيها

* * *

نارين ظلت تسعر ابدلالي وغيرت حالي
نار اعله همي ونار فكد الغالي وغيرت حالي
ومن أثر جمرتن سهرت ليالي وغيرت حالي
وابگلبي دار النوح صارت مبانيها
واتهدمت دارين واتوجرت نارين
بمصاب راعيها

* * *

دارين هاليوم الدهر هدمها عندك علمها
عز وأبه الدارين ما أعظمها عندك علمها
وجروح گلبي الداميه شيلمها عندك علمها
اصرخ واصيح اجروح گلبي اشيداويها
متصوب ابجرحين واتوجرت نارين
بمصاب راعيها

* * *

جرحين خلّتي أجر انياحه وما شفت راحه
من يوم ابن جعفر طفوا مصباحه ما شفت راحه
سهمين صابن چبدتي الجراحه ما شفت راحه
سهام المصبيه اليوم صابت مراميها
وابجمرة السهمين واتوجرت نارين
بمصاب راعيها

* * *

سهمين نيشنها الدهر بعيوني وغيرت لوني

وگوم اللّٰی غدروا موسى ما رحموني وغيّرت لوني
يا ريت گبله بهالسنجن خلوني وغيّرت لوني
روحي اويّه روحه هناك بالسنجن تلگيها
متغيّيه الروحين واتوجرت نارين
بمصّاب راعيها

* * *

روحين غابت بالسنجن تدريها وتعرف اشبيها
روحي اويّه روح الكاظم امغيّبيها وتعرف اشبيها
الكاظم چبدتي وچبدته امگطعيها وتعرف اشبيها
وأهل المكيدّه ابهاي نالت امانيه
من گطعوا الچبدين واتوجرت نارين
بمصّاب راعيها

* * *

چبدين ظلت بالسنجن هذا اليوم تتفايض دموم
چبدتي وچبد كاظم الغيظ المسموم تتفايض دموم
سهرانه عيني وأبد ما شافت نوم تتفايض دموم
وسبع العوالي اليوم منگلب عاليها
مصيوبه بمصّابين واتوجرت نارين
بمصّاب راعيها

* * *

مصّابين واحد أفجع من الثاني تسمع بياني
مصّابي ومصّاب الكاظم ابوجداني تسمع بياني
واتحمّلتها ابمنطلق إيماني تسمع بياني
بالصبر والإيمان متصبرّ اعليها
دم فاضت العينين واتوجرت نارين
بمصّاب راعيها

* * *

الزفاف المفجع

(سريع)

يا شاب صارت عالحرب زفته وانعجنت إيدم النحر حنته

* * *

نشد من أهل المعرفة ونستمع يا شاب ليلة عرسه هل الدمع
وزفته سمر القنه بدال الشمع او وردة حياته إرتوت من دمعته

* * *

عريس وشموعه رماح العده وبيض الأشفار ايشوفها مجرد
وگباله سبعين ألف متجنده للخيم تربي وتنتظر طلعتة

* * *

الهذا الشهم يا معرس ايمائله وحافر الخيل إطبول صارت اله
وبالخيمه امه ايشوفها اموجلّه أيساعدها الله الرمله من شافته

* * *

بيا عين رمله لهالولد تنظره عريس دمع وداعها امعطره
وجعوده فوگ امتونه متنشره اسم الله اعله اسمك يولدي نادته

* * *

اوصيك بيني وللوصيه إنتبه وجهك لغير النصر لا يتجه
سبحان رب الصاغك هالوجه جلّت صفات الخالق وقدرته

* * *

جاوبها لا ياخذچ بيّه العجب گبلي وجه الأكبر ايدم انخضب
واجبهي ثار ابن عمي انكتب هيهات أنسه الأكبر وفرگته

* * *

من طلع يتخطّه من بين الخيم مثل الغصن يتمايل اويه النسم
حيّاه مأتلفه اويه شخصه الهمم وما تختلف عن الحسن همته

* * *

لاح إعله مهره وعالمعاره انعطف وابشدة الصارم دليله انشغف
ومثّل علي بالحومه لمن وكف وفرّق العسكر من بدت حملته

* * *

ثائر وقلبه للنصر عاشقه وابصاره الأرواح متعلقه
وصورة الأكبر أبد متفارقه اشما طبر يذكر الأكبر وطبرته

* * *

وسام الشهاده الجاسم ايلوگ اله ونقذ وصية والده ابكريله
وجسمه تغسل من دمه المرجله وامه بدمعها وهجت شمعتة

* * *

دمشق ١٩٨٠ م

حديث الأسي

(سريع)

عن هالظلم للعالم إنحدته وبكل زمن تتكرر الحادته
انصفح التاريخ الذي انصدقه وابقه وعي ومعرفه اندققه
وبهالاحداث الجاريه انطابقه ونكشف منين إبتدت هالكارته

* * *

لو ردنه لأسباب الحدث نحتدي من عهد غصّاب الفدك نبتدي
وانشوف ذاك الظالم المعتدي چم طاغي بعده لهالظلم وارته

* * *

ونرجع نخوض الجوله من الأساس من حرب صفين انوجد الانعكاس
دلالي قيح انترس منكم يناس حيدر لهذا المنطق إمريته

* * *

هاي المآسي بالحسن تتصل وابصير أبوه المرتضى ممثّل
ليش إنرمه نعش الحسن بالنبل؟ ندرس الحاله وللسبب نبخته

* * *

انحدث وما ننسه حديث الأمين (حسين مني وأنا من حسين)
وانشوف بالطف انقطع يا وتين ونعرف يزيد اليا ثغر ناكته

* * *

وزين العباد الجبدته مكطعه والباقر امشايه بهالفاجعه
ومصاب ابنه الصادق أيتابعه من هالاشرار البالكفر جائته

* * *

وكاظم الغيظ البالصبر منوصف ابسجن الرشيد وظلمه شاف الحتف
وابنه الرضا عنه فلا يختلف وروحه بدياجير الكفر لاثته

* * *

والرضا نجبه انكضه بدار الغرب وموقف الغريه ايصير موقف صعب
المأمون ظالم بالمثل ينضرب ثعبان سمه ابكل عصر نافته

* * *

للرضا من اجعله والي العهد كل ضئّه چان بھالمكیده اجتھد
ومأمون هذا العصر ادهی واشد وهذا الظلم ذاك الظلم باعته

* * *

دمشق ١٩٨٠ م

الحوار اللاذع

زينب ابغثر الإيمان لثمت نحر واليها
ونادته مبارك يحسين بالجنة متمنيها

* * *

طلعت الحره الجسم عود السجاد
من شافت الراس انرفع عالمياد
ما خلفت الموعد مضت عالميعاد
من سمعت الصوت ايصيح لعيالچ اتكفليها

* * *

عالصوت راحت وابصدرها العبره
شافت جسم واليها فوگ الغبره
احتارت بامرها وغدت تنشد نحره
جثتك ييو الاكبر ليش فوگ الثره اخليها

* * *

بسييف الكفر يحسين نحره
المطلوب ثار أعرف إيدمه ايوفره
ما سامعه المجتول عاري ايجلوه
والجثتك يا مظلوم ليش العده امسليها

* * *

امن الطمع سلبوا جثتك هالاشرار
ومطلوب ثار وصار بيك الماصار
أرد انشد الخياله هم تطلب ثار؟
بين امي لضلوعك ليش بالحافر مهشميها؟

* * *

صدرك الخيل عداك چان شتمطلوب
يا سبب فوگ الرمح راسك منصوب؟
أقسم ابكطعة خنصرک يا مسلوب

غير آل اميه بهالكون ما واحد امسويها

* * *

حيّرني أمرك يا جتيل العيره
اليشوف جثتك ميتمالك صبره
من مثلك امغسلية من دم نحره
للغسل ما يحصل ماي ابيض الدمه امغسليةها؟

* * *

عدوانك ابهالحاله مغزاها اشجان
من ثره المصرع الك تنسج اكفان
كون انته تتجقن ابداري التربان
لا وحگ جثتك يحسين المين الثره امجفنيهها

* * *

يا ريت يحضر بالطفوف الهادي
وايشوف بيّه وييك خويه اشسادي
ويرجع يلم اعيالك من الوادي
حايه ومذعوره الراي والخيّل تسحگ بيها

* * *

زينب تحشم جسم أخوها المظلوم
تترجه جثّه بلايه راس الها اتگوم
گعدت تشم اصواب نحره المالموم
يحسين زينب تنخاك ما تكعد اتحاجيهها

* * *

گطعت گلي يا گطيع المنحر
ابجبد اختك صواب المثلث أثر
باصري نوگ اليسر من تتحضر
عيالك ابدرب الشامات يا هو الذي ايباريها

* * *

حفظ اللسان

لسانك يصاحب ميزان حافظ على ميزانك

* * *

من تحجي يا صاحب تذكر دونك
ميزان بيه الوادم أقيسونك
لسانك حصانك من تصونه ايصونك
والمثل واضح تنهان لمن تهين لسانك

* * *

لا تجعل لسانك سهم بيه اتصيب
سهم اليخطي الهدف راعيّه يخيب
وعورات غيرك لو شفتهن لتعيب
يا صاح كلّك عورات والبيّنه ابخفيانك

* * *

لو چنت صاحب ملومات واحساس
من تحكم احكم عدل ما بين الناس
لمن تشيد لا تحط بيدك فاس
من كبل تهديم الغير بي ينهدم بنيانك

* * *

ابدرب المهالك لا تحث بالممشه
والما تنفعاك انطي اذن الطرشه
بفالك من اتلم الدهر واتطشه
تشاهد حسابك مضبوط من ينضبط إيمانك

* * *

لو ردت تكرم حاجه لا تبذلها
صاحب الدرّه لو رخصها ايدلها
غايه البعيده لو ردت توصلها
لا تذب زور ابممشاك إمشي ابقدر إمكانك

* * *

من تصعد اعلاه العالي بالك تغتر
اشما تصعد ابعين اللي حدرك تزغر
وبقطعة الرمانه تلحگ جعفر
وگعتك عالگاع اتصير من منقصه عرفانك

* * *

لو شفت واگع حال ويريدك عون
عينه ولتطغه وتنكبله فرعون
هل الك يظهر موسى وتشوفه اشلون
حامل عصاته ايمناه وايغرگك ابطغيانك

* * *

لو صح الك اخ باخوة هاييل
لا تتبع وياه غاية قاييل
لو جاك أبو مره ابتعد عنه وميل
من گبلي گله لقاييل صدته ابشرك بهتانك

* * *

لو والمك منكر تبعد عنه
لو ردت درب اللي تحصل منه
امشي بدرب سيد شباب الجنه
اتفوز ابنعيم الفردوس من ينشكر سعوانك

* * *

بغداد ١٩٧٥ م

الطفل الرضيع

(عگيلي)

عبد الله ابنبله أيفطمونه

* * *

بين العسكر من ظل وحده حسين وما من ناصر عنده
رد لعياله ايجدد عهده بآخر توديع ايودعونه

* * *

من رد حسين اتلگنه ربّات الخدر أيودعنه
واعليه أهون وايشمنه وحسين ايشوبح بعيونه

* * *

يشوبح بعيونه اعله اطفاله واعله فراگه ايصبر عياله
عبد الله ايمهده اترأواله ناشد عن امه المحزونه

* * *

زينب نادت يا ابو اليمه طفلك ذايب كلبه وجسمه
وظلت امه بهمها وهمه وموتتها اعله ابنك مضمونه

* * *

ناداها اعليّه ابعد الله مهموم وي خل اتسله
اتعنت بي لحسين اتحملة للوالي ابطفله أيسلونه

* * *

ضم حسين بطفله لصدرة راد ايطقي لابنه الجمره
لن أيشوف النبله ابنحره الطفل بيا ثار أيطلبونه

* * *

من دم نحره الطفل اتخضب والوالد بصوابه اتصوّب
صاح من ايدي اخذي يا زينب ودّيه لأمه المحزونه

* * *

اتودّيه لأمه بيا حاله وبالمدمع ظلت تبراله
مذبوح ابنبله چتاله والمهده اشلون يودونه

* * *

الكاظمية المقدسة ١٩٧٦ م

البسالة الهاشمية

(عكيلي)

عباس وزم بيده الرايه اشحده اليوصل حد الثايه

* * *

قائد لعهوده معززها وبجفه الرايه مركزها
وبنصرة دينه مطرزا آيه وبيمينه ترف آيه

* * *

آيه ومن حيدر وارثها ونيران الكون ومورثها
باد الحمله وما ريثها وفرت سيافه ورمايه

* * *

وبعزمه لميدانه يجوله وظل يتخطه بعرضه وطوله
لن يسمع صوت المكفوله يالكافل جيتك شجايه

* * *

جيتك يا ضيغم يمجنه يالسيفك باسمك يتغنه
ارد اشكيلك جمر الحنه جمره فركتكم وضمايه

* * *

والانته مؤزم بحماها يا عباس اسمع نحوها
تربي اعله الجود بعيناها ترويه تريك من مايه

* * *

المعتوب يوفي بعتابه بالخيمه عيالك مرتابه
من نار ضمها اللهابه وتعرف شيطفي اللضايه

* * *

جودك للنار يطفئها ولگلوب الجفت يرويها
اشلون بحاله مخلبيها يا بحر الجود وعطايه

* * *

من صد لايتامه بعيونه وامنها ولوح ميمونه
ذب جود الماي اعله متونه ونشف دمعتها الهمايه

* * *

من فَرَّحَ كَلْبَ الكَافِلِهَا لِكَلُوبِ العِسْكَرِ جَفَلَهَا
بِمَيُولِ الصَّارِمِ مِيلَهَا وَبِرَمَحِهِ الحُومَهُ مَغْطَايَهُ

* * *

وَكَفَّ الجِيْمَانِ المِصْطَفَى وَبِالصَّارِمِ للعِسْكَرِ صَفَى
اِحْتَلَّ الشَّاطِئِي بَزُودَ وَعَقَى وَمِنْ اِسْمِهِ العَقَى مَسْمَايَهُ

* * *

مِنْ ذَبِ الجُودِ اَعْلَهُ يَمِينُهُ وَالْمَكْدَرِ لِيهِ اَمْعِينُهُ
صَابَ الجُودِ وَصُوبَ عَيْنِهِ وَاَيَّسَ عَبَّاسٍ مِنَ الغَايَةِ

* * *

وَالْعَامُودِ الصَّوْبِ هَامَهُ حَلَّ مَا بَيْنَهُ وَبَيْنَ خِيَامِهِ
لَنْ يَسْمَعَ صَرَخَاتِ اِيْتَامِهِ صَرَخَاتِ وَظَلَّتْ دَوَايِهِ

* * *

الكَازِمِيَّةُ المَقْدِسَةُ ١٩٧٧ م

النعي

العباس (عليه السلام)

هاك اخذ يا عباس شكواي جمر العطش بالكلب سري
مثل الخيم متلاهب حشاي لا تضن اشكيك من ضماي
يا أبا الفضل جزئه من الماي لاچن اجيت اشكي من عداي
خلت حرمكم فاجده اراي وتنادي وين الكفل بحماي
وينك بمن للعهد وفاي انحض من المصرع يرجواي
وباصري يا أبا الفضل بهاي لليسر من يصير ممشاي
ترضه الشمر بالظعن حداي

* * *

القاسم بن الحسن (عليه السلام)

يا جاسم مبارك بعرك طابت بهذا العرس نفسك
بالخومه بيني اسمعت حسك من ابزغت للحرب شمك
لقنت للعدوان درسك يوليدي بسك بعد بسك
خلي الشهاده تروي غرسك لا زال دمك كتب طرسك
هاك اخذ روح امك تحرسك

* * *

علي الأكبر (عليه السلام)

شمحلاك يوليدي بالأكبر من لوحظ ظهر المسفسر
مثلت بالميدان حيدر وذكرت عدوانك بنخير
ما ادري تالي البدر الأزهر من العليه عالغيره ايتكور
وانظر لعد جسمك اموذر بسيوف عدوانك مطير
التفكد ابنها اشلون تكدّر ماتم صبر الله واكبر
ومن الصبر گلي تفطر

* * *

الحر الرياحي

الحر الرياحي بالخراب ابهمته ناصر آل غالب

وبسيفه طيّع هالكنايب راواها للحومه العجايب
وانكشفت اغيوم المصايب ولمن وگع طود المناقب
جثته شالتها الكرايب بس ظلت جسوم الأطايب
متوذره بسيف النوايب چاوينهم آل أبو طالب
ما تدري گلب حسين ذايب وصيوانه بالنيران لاهب
والحرم ما بين النواصب

* * *

الهوسات

للحسين (عليه السلام)

يا لسرك نقد آدم من العصيان
يسفينه السرت وابتجرت عالطوفان
يلسان اللي بيه اتميز سليمان
يچف السلط ابراهيم عالوثان
يلّي سرك امصور العصى ثعبان
يا آية موسى المعروفه غايته بحبك مكشوفه

* * *

يا سر الزبور ومحتوى الإنجيل
يا تورات موسى وناسخ التصيل
يا محمل القرآن بهدى التاويل
يا من بالمهد ناغاك جبرائيل
صوتك بالضمائر نفخة إسرائيل
ماتت وبصوتك تحيها ومن نومة غيها اتصحيها

* * *

يا حجة الباري ومصلح الأمة
يا فرع النبوه ووارث العصمه
يا روح الإسلام ومنهجه وحكمه
يا سيف الإله القاطع الجسمه
يالنحرك امنور العرش من دمه
يحسين بحبك آمنه يحسين وتدرى شنتمنه

* * *

يلّي اختارك الباري لفداء الدين
يلّي فقت بالتضحية اعله الماضين
لهذا اليوم دمك ما نشف يحسين
وظلت عالنهر جود ولوه وچفين

يحسين وزينب مسبيه وضعنك چتالك حاديّه

* * *

الكاظمية المقدسة ١٩٧٨ م

للعباس بن علي (عليه السلام)

هذا انتّه يخويه والحرايب هاي
يا سدة اسكندر يا كفيل حماي
مسنى العطش يا عباس شنهو الراي
زينب وتحشم واليها مواعدها يكون يوقّيه

* * *

تغطرس بالعزم واتمطه برچابه
وضهضب اباللوه چنه اسد غابه
ذب جوده اعله متنه واشرع حرايه
شيصبره وزينب عطشانه سيطر عالشاطي وفرسانه

* * *

للجود يمين الغانمه زمه
لاچن الحماسه احترگت بجسمه
كل همه يجيب الماي كل همه
عباس اتوسط بالحومه شحده اليوصل للملزومه

* * *

وصل للعلگمي وامتلك جاريّه
وعينه اعله المخيم ظلت ربيّه
وجاري العذب لمن غرف من ميه
واتدّكر بحسين واطفاله واتغير من حاله لحاله

* * *

تدّكر أبو اليمه وفاض دمع العين
وعاتب نفسه بالفاظ الابيه والدين
هوني يا نفس من بعد اخويه حسين
من ذب الجود اعله متونه اندارت عالصيوان عيونه

* * *

گمر هاشم ولاح مهنده بينماه
حط السيف بيد وايد بيها لواه
گبل ميحانه صوت التضحيه ناداه
عونك يا ضيغم يمچنه انفتحتلك ابواب الجنه

* * *

الكاظمية المقدسة ١٩٧٨ م

الأبوزيه

يلايم لا تلوم الكلب دمعين
جرح البيه ما يندمل دمعين
فايض بالجفن هاليوم دمعين
على مصاب النبي وظلع الزجيه

* * *

مثل الدوح للونه نبيها
تناوبنه ابجن واحنه نبيها
اشلون امه الذي خانت نبيها
ونقضت بيعته وأمر الوصيه

* * *

يتاج ابراس أهل الحگ والاشراف
ونور الباري بالهيبة والاشراف
الكعبه الها شرف عالي والاشراف
الك بيت الولاده أصبحت هيه

* * *

الحسين (عليه السلام)

دليلي امصوّب ومختار بالهام
ابرزية كربلاء ما ركن بالهام
أخويه حسين صابه للحجر بالهام
وطاح من المهر فوگ الوطيه

* * *

الصبر ثوب وتفصّلي وحاله
على اللي ابصرعه الباري وحاله
حالي اميسره أمشي وحاله
ثلث تيام مرمي اعله الوطيه

* * *

العباس (عليه السلام)

انه زينب وعگلي انشل ورايه
رحت للنهر ومصابي ورايه
إلي جفين عالشاطي ورايه
انطوت يم الكمر فوگ الوطيه

* * *

بسك يا دهر بالحزن وآنه
دليلي ذاب لمن كثر وآنه
أخويه اعلى الثره مطروح وآنه
باچر بالحرم أمشي سبيه

* * *

جرعت من النوايب راح من راح
وانطحتن ظلوعي براح من راح
انشدك على كفيلي الراح من راح
دمي ودمعي يتفايض سويه

* * *

علي الأكبر (عليه السلام)

چم گلب ابتله بحزني والي شاب
وحرگته ابجمرة مصابي والي شاب
الي والي انگطع نحره والي شاب
الاكبر واخذته مني المنيه

* * *

يا يوم اخلص من الهظم يا يوم
وعليه الدهر بالاهات يا يوم
حسبتك للدفن تحضرني يا يوم
مچنت احسب حساب الغاضريه

* * *

القاسم (عليه السلام)

يجاسم چنت الي بدنياي فاتن
وسهام الحزن للكلب فاتن
فاتني ليالي البيض فاتن
وظفوا شمعاتك العجانت زهيه

* * *

القدر كل ساعه الي صوره يجاسم
وسيف مصابك لكلي يجاسم
اخذ وياك دلالي يجاسم
عنك يشكف سهام المنيه

* * *

الإمام السجاد (عليه السلام)

يعيني جودي بالمدمع يعيني
ولا ريدن بشر بالهم يعيني
عليل وشفته برض الطف يعيني
جرم علقته وغارات آل اميه

* * *

مسلم بن عقيل

الدهر غرب هلالاته وهلها
ودموعي دموم اذرفها وهلها
الكوفه خانت بمسلم وهلها
وغريب انجتل ما بين آل اميه

* * *

الحر الرياحي

الحر للعدل خط رايه ولا ظل
بحر الشمس لا كاسر ولا ظل
اهله شالته لجسمه ولا ظل
الماعدهم أهل ظلوا رميه

* * *

جابر الأنصاري

كسير ومحد الكسري يجابر
وتدري بالقدر حكمه يجابر
عن حسين لا تنشد يجابر
هذي عيلته الجانت سبيه

* * *

المباراه

شيعةي مهما شربتم عذب ماء فاذكروني
القدر مسرع ويايه بهظم ما أن
ومثل وثأت گلي گلب ما أن
يشيعه اشما شربتم عذب ما أن
اذكروني بمصاب الغاضريه

* * *

قد كان عريساً ولكن بالدماء عوض الخضاب بكرىلا قد خُصبا
شباب الحومته لمن بدلها
صب الرعب من سيفه بدلها
انعجنت حنته لاچن بدلها
تحنه بالدمه وعرسه المنيه

* * *

لئن قَصَدَ الحجاجُ بيتاً بمكةٍ وطافوا ببيتِ والذبيح جريحه
فاني بوادي الطفِ أصبحتُ مُحَرِّماً أطوفُ ببيتِ والحسينُ ذبيحه
أقول ابيقضي أو لا هجر بالطف
تكمل الناس حج البيت بالطف
وأنه محرم صبحت اليوم بالطف
احج كعبة ذبيح الغاضريه

* * *

وفتيه من بني عدنان ما نظرتُ عينُ الغزاةِ أعلى مِنْهُمْ حَسَباً
من كلِّ جسمٍ بوجهِ الأرضِ مُنْعَفِرٍ وكلُّ رأسٍ برأسِ الرُمحِ قَدْ نُصِبَا

خطب عين الغزاله اتگول سايد
مثل فتية بني عدنان سايد
من كل جسم فوگ الكاع سايد
وكل راس انرفع عالسهمريه
* * *

الموال

في حق الأمير (عليه السلام)

يا علي گلبی بودادک هام الک هام الک
والروح واضح عشگها هام الک هام الک
ما يوم فکري تضنه هام الک هام الک
واستارثت هالمجه من هلي من هلي
وچاسات حبک رشفها من هلي من هلي
غيرک بهاي العوالم من هلي من هلي

* * *

وسوط النوايب لمتني باسمه باسمه
وفلك الإله بيمينک باسمه باسمه
هالناس کلهم نجومک باسمه باسمه
شخصک صفتله المعاجز عادله عادله
عالشمس شار وقرصها عادله عادله
وصارمک ميزان للحق عادله عادله

* * *

وانغرز سرك بسورة هل اته هل اته
وروحک ازمرد علينه هل اته هل اته
وهلال سعدک صفاتک هل اته هل اته
وسرك رفع کل بله شظل يابله يابله
واسمک لاسم الجلاله يابله يابله
سليمان ذاک العرش من يابله يابله

(متّوج بتاج المعاجز هام الک هام الک)

* * *

طهران - ۱۹۸۱ م

اجتماعي

شبه الصوافن صرت مره اسرع ومروان
حامل ابضهري العذب لاچن أبد مروان
ما بين فرحه وحزن مره ابتسم مروان
ولو ردت أبث العتب للي تنومس شبت
واللي تشبت عليّ ماني اعله فعله شبت
مروان ابن الحكم مختلف عنه شبت

لو ردت تعرف شبت اقره بصحف مروان

* * *

بغداد ١٩٧٥ م

للإمام الحجة بن الحسن (عليه السلام)

يا مجزي بأحسان لّلي عن بغض سايلك
كلبي هوه أبحضرتك يا مالكة سايلك
شاهد نميره نضح لمودتك سايلك
غذتني أبحبك البجانت تّمز مهدي
ليك اهتديت الدرب ولغيركم مهدي
للمهدي نخوة محب بيدك ييو المهدي

اتكله محبك الك من الفرج سايلك

* * *

الكاظمية المقدسة ١٩٧٨ م

الفهرس

٢	مقدمة
٤	في قصائد الكعدة
٥	وا مُجَّده
٨	تعريد القلوب
١٢	مسلم بن عقيل
١٦	مسيرة الحسين (عليه السلام)
٢٠	نداء السيف
٢٣	الأسرار
٢٦	الحرّ الرياحي
٢٩	صرخة أنصار الحسين (عليه السلام)
٣٢	راية الإيمان
٣٦	للقاسم آيات
٤٠	جهاد الأكبر عليه السلام
٤٤	من أجل العقيدة
٤٧	رجوع السبايا
٥١	الحسن بن علي (عليه السلام)
٥٤	الكاظم حياقي وروحي
٥٧	في قصائد اللطم
٥٨	مُجَّد بن الحنفية
٦١	سر الله المكنون
٦٤	الحسين (عليه السلام) كعبة الثوار
٦٦	ماذا جرى في الطفوف
٦٨	قم يا أبا الفضل
٧١	يا فرج الله

٧٣	مصرع العباس (عليه السلام)
٧٥	يوم عاشوراء
٧٧	استنهاض وعتاب
٧٩	علي الأكبر
٨١	فراق علي الأكبر
٨٣	أنا زينب
٨٥	حنان رمله
٨٧	حسين مني وأنا من حسين
٨٩	والعصر
٩١	البدور الهاشمية
٩٣	الزهراء (عليها السلام)
٩٦	الشأن الأعظم
٩٩	الثورة المحمدية
١٠٢	مصير الأمة
١٠٥	دستور العقيدة
١٠٨	الندبة الجارحة
١١١	الصمود أمام الرزايا
١١٣	اليوم الخالد
١١٥	مواقف زينية
١١٧	الوالد على سر أبيه
١٢٠	ليلي
١٢٢	اين الكفيل
١٢٥	الأصوات الهادئة
١٢٧	علي بن الحسين (عليه السلام)
١٢٩	غريب بغداد
١٣٢	الزفاف المفجع

١٣٤	حديث الأسي
١٣٦	الحوار اللاذع
١٣٩	حفظ اللسان
١٤١	الطفل الرضيع
١٤٣	البسالة الهاشمية
١٤٥	النعي
١٤٧	الهوسات
١٥٠	الأبوزيه
١٥٥	الموال
١٥٥	في حق الأمير (عليه السلام)
١٥٧	اجتماعي
١٥٨	للإمام الحجة بن الحسن (عليه السلام)